

清

史

稿

清史稿

列傳一百九十

勝保

托明阿

德興阿

勝保字克齋蘇完瓜爾佳氏滿洲鑲白旗人道光二十年舉人考授順天府教授遷贊善大考二等擢侍講累遷祭酒屢上疏言事甚著風采歷光祿寺卿內閣學士咸豐二年因天變上疏論時政言甚切直略謂廣西賊勢猖獗廣東湖南皆可憂賽尙阿督師無功請明賞罰以振紀綱河決不治河員之罪刑輕盜風日熾應明敕法以肅典常臣工奏摺多留中恐滋流弊一切事務硃批多而諭旨少市井細民時或私論聖德疏入下樞臣傳問疏末兩端令直言無隱覆奏曰硃批因事垂詢臣工奉到遵行他人不與聞非若諭旨頒示天下近日諸臣條奏雖依議而原奏之人不知交部重案覆奏依議外人並不知作何發落古者象魏懸書俾衆屬目似宜通行宣示以昭朝廷之令甲而杜胥吏之蔽欺至愚賤私議或謂皇上勵精之心不如初政或謂勤儉之德不及先皇今遊觀

之所煥然一新釋服之後必將有適性陶情之事見在內府已有採辦梨園服飾以備進御者夫鼓樂田獵何損聖德然自古帝王必先天下之憂而憂後天下之樂而樂書曰無于水監當于民監誠不可不察也文宗不憚明諭指駁以其意存諷諫不之罪也尋因自行撤回封奏降四品京堂會粵匪犯武昌勝保疏陳辦賊方略命馳往河南交欽差大臣琦善差遣三年春偕提督陳金綬率兵援湖北安徽而江甯告急至則城已陷駐兵江浦勝保疏陳軍事稱旨命以內閣學士會辦軍務克浦口而賊陷揚州偕陳金綬進勦擊賊鎮海寺南破之薄揚州城下賜花翎又連破賊於天甯廣儲門外奉命赴安徽勦賊而賊已入河南渡河圍懷慶勝保會諸軍進擊將軍托明阿軍其東勝保軍其南時督師大學士訥爾經額遙駐臨洺關援軍數路久頓城下惟二軍戰較力命勝保幫辦河北軍務七月分三路進攻賊壘大破之懷慶圍解加都統銜賜黃馬褂予霍鑾巴圖魯名號賊竄山西連陷數縣諸軍遷延惟勝保率善祿西凌阿兵四千尾追一破之封門山口再破之平陽繞出賊前扼韓侯嶺尋復洪洞平陽勦

逗留諸將托雲保董占元烏勒欣泰等罪之詔嘉勝保果勇有爲授欽差大臣代納爾經額督師節制各路特賜康熙朝安親王所進神雀刀凡貽誤軍情者副將以下立斬以聞賊既不得北竄轉而南由澤潞間道入直隸境納爾經額師潰於臨洛關賊復猖獗竄順德趙州正定勝保由井陘一路迎截坐迫賊不力鑄二級命惠親王繇愉爲大將軍科爾沁郡王僧格林沁爲參贊大臣駐軍涿州直隸軍務仍責勝保專任而以西凌阿善祿副之賊東竄由深州河間窺天津勝保轉戰追賊至靜海賊由獨流分踞楊柳青迭擊之遂聚於靜海獨流負嵎久踞詔僧格林沁進軍合勦四年春賊突圍走阜城追擊殲賊數千陣斃悍酋吉文光而援賊由江北偷渡黃河擾山東命勝保移兵往勦臨清失守坐視職戴罪自效尋破賊克臨清餘賊南走迫擊迭破之解散甚衆及竄入豐縣僅千餘人燧之河岸悉數殲除捷聞復職加太子少保僧格林沁圍林鳳祥李開方於連鎮久未下命勝保回軍會勦開方突出分股竄山東勝保親率輕騎追之賊陷高唐踞守圍之數月不能克迭詔詰責褫職逮京治罪遣戍新疆直

隸山東賊既平子藍翎侍衛充伊犁領隊大臣六年召還發往安徽軍營差遣
七年子副都統銜幫辦河南軍務擒匪方燧勝保至連破之方家集烏龍集柳
溝集克三河尖老巢又克河關復霍邱大捷於正陽關斬擒首魏藍奇等加頭
品頂戴八年平鄂家集喬家廟趙屯諸擒巢粵匪大股圍固始擊破之殲賊萬
餘斬偽顯天侯卜占魁等固始圍解詔嘉謀勇兼優遇都統缺出提奏復黃馬
褂巴圖魯免其弟廉保遣戍罪粵匪陳玉成李侍賢合陷廬州鳳陽授勝保鎮
黃旗蒙古都統命爲欽差大臣督辦安徽軍務連破賊於定遠池河高橋督軍
抵三河賊遁走擒首李兆受久踞江淮間與粵匪勾結及見粵匪屢挫漸持兩
端勝保親至清流關密招之許歸誠後免罪授官兆受以其部下家屬在江南
請緩發至是進攻天長兆受內應克之遂獻滁州奏授參將職改名世忠安置
降衆自爲一軍九年克六安擒首張元龍以鳳陽降復臨淮關進克霍山盱眙
破賊清水鎮斬其酋吳加孝遂克懷遠而廬州定遠久未下賊仍蔓延丁母憂
奪情留軍十年罷欽差大臣命赴河南勦匪御史林之望論劾降授鎮藍旗漢

軍副都統復坐勦匪不力降授光祿寺卿召回京甫至會英法聯軍內犯命率八旗禁軍駐定福莊借僧格林沁瑞麟進戰通州八里橋敗績勝保受傷退保京師停戰議和勝保收集各路潰軍及勦王師續至者共萬餘人疏陳京兵亟應訓練擬議章程以進命兼管圓明園八旗內務府包衣三旗親督操練是爲改練京兵之始十一年擢兵部侍郎檢匪擾山東詔分所部五千人畀僧格林沁往勦尋命勝保赴直東交界治防連克邱縣館陶冠縣莘縣破賊老巢招降擒首宋景詩率衆隨軍復朝城觀城命督辦河南安徽勦匪事宜河北肅清予優叙是年七月文宗崩於行在穆宗嗣位肅順賊垣端華等輔政專擅勝保昌言將入清君側肅順等頗忌憚之洎回鑾上疏曰政柄操之自上非臣下所得專皇上冲齡嗣位輔政得人方足以資治理怡親王載垣鄭親王端華等非不宣力有年赫赫師尹民具爾瞻今竟攬君國大權以臣僕而代綸音挾至尊而令天下實無以副寄託之望而鑿四海之心該王等以承寫殊諭爲辭居之無疑不知皇上續承大統天與人歸原不以殊諭之有無爲重至贊襄政務當以

親親尊賢爲斷不當專以承寫爲憑先皇帝彌留之際近支親王多不在側仰窺顧命苦衷所以未留親筆殊諭者未必非以輔政之難得其人待皇上自擇而任之以成未竟之志也嗣聖既未親政皇太后又不臨朝是政柄盡付之該王等數人其託諸聖籤簡放鈐用符信圖章以此取信於人無如人皆不信民謬可畏天下難欺近如御史董元醇條陳極有關繫應准應駁惟當斷自聖裁廣集廷議以定行止乃徑行擬旨駁斥已開矯竊之端大失臣民之望道路之人皆曰此非吾君之言也非母后聖母之意也一切發號施令真偽難分衆情洶洶咸懷不服夫天下者宣宗成皇帝之天下傳之文宗顯皇帝以付之我皇上者也昔我文皇后雖無垂簾之明文而有聽政之實用爲今之計非皇太后親理萬幾召對羣臣無以通下情而正國體非特簡近支親王佐理庶政盡心匡弼無以振紀綱而順人心惟有顛懇皇上俯察芻蕘即奉皇太后權宜聽政而於近支親王擇賢而任仍秉命而行以成邸治奏上會大學士周祖培等亦以爲言下廷議從之肅順等並伏法尋授鑲黃旗滿洲都統兼正藍旗護軍統

領時擒匪肆擾皖豫間以張洛行爲最強苗沛霖自踞壽州逼走巡撫翁同書
後伴稱就撫陰與粵匪陳玉成勾結署巡撫賈臻被圍於潁州久不解楚軍已
克安慶陳玉成退踞廬州朝廷本意安徽軍事屬之李續宜用爲巡撫沛霖舊
隸勝保部下心憚楚軍揚言勝保來始薙髮買藥以聞詔促勝保援潁州同治
元年遣軍先進爲賊所挫三月勝保至擊破賊壘圍乃解加兵部尙書銜多隆
阿等克廬州陳玉成遁走沛霖誘禽之獻於勝保軍詔於軍前誅玉成赦沛霖
罪許立功後復官沛霖擁衆號十萬所屬二百餘圩與張洛行勢敵相仇自請
勦之心實叵測詔詢曾國藩官文李續宜袁甲三等皆主勦獨勝保一意主撫
上疏言事權不一身爲客軍地方掣肘請以安徽河南兩巡撫幫辦軍務允之
迭詔訓飭褒其才略戒其驕愎卒不悛力言沛霖無他而爲李續宜所疑恐激
變續宜奉旨進駐潁州亦迄不至會陝西回亂熾多隆阿援軍阻隔不能遽達
遂授勝保欽差大臣督辦陝西軍務八月轉戰至西安解其圍降擒宋景詩中
途率衆叛走東路同州朝邑猶爲回踞詔責勝保專勦東路命多隆阿進軍分

任西路勝保力不能制賊而忌多隆阿擅調苗沛霖率兵赴陝嚴詔斥阻不聽
命僧格林沁大軍監制乃止於是中外交章劾勝保驕縱貪淫冒餉納賄擁兵
縱寇欺罔貽誤下僧格林沁及山西巡撫英桂西安副都統德興阿察實奏上
密詔多隆阿率師至陝傳旨宣布勝保罪狀褫職逮京交刑部治罪籍其家二
年王大臣會鞫勝保僅自承摺妾隨營呈訴參劾諸人誣告之罪詔斥其貪污
欺罔天下共知苗沛霖已戕官踞城宋景詩反覆背叛皆其養癰貽患不得謂
無挾制朝廷之意念其戰功足錄從寬賜自盡並逮其從官論罪有差當其被
逮也降擒李世忠已擢至提督請黜已官爲之贖罪不許御史吳台壽疏言勝
保有克敵禦侮之功無失地喪師之罪請從未減台壽兄台朗在勝保軍中詔
斥黨附褫台壽職

托明阿鄂棟氏滿洲正紅旗人由侍衛擢護軍參領出爲山東兗州營游擊從
巡撫武隆阿征回疆以功賜花翎累擢曹州鎮總兵調四川松潘重慶二鎮道
光二十四年擢四川提督以病去職二十七年起授烏魯木齊提督調陝西擢

綏遠城將軍整飭戎政勤於訓練咸豐三年粵匪林鳳祥等陷揚州迺准徐命率所部赴江南山東交界防堵進屯清江浦賊竄滁州托明阿赴援與周天爵會勦遂追賊至河南迭戰於睢州杞縣陳留中牟進克汜水殲賊千餘被珍寶命襲辦軍務賊竄河北圍懷慶乃渡河會諸軍分路進攻迭有斬獲賊築土城樹木柵以拒合攻破之禽斬數千賊始遁懷慶圍解論功賜黃馬褂子西林巴圖魯名號追賊山西詔以勝保督師命托明阿襄辦賊竄入直隸境坐降五級留任尋以傷劇解職回旗四年春病痊命赴直隸仍幫辦僧格林沁勝保軍務賊方踞阜城堅守不出諸軍圍之托明阿屯東北賊來撲輒擊退突由東南隅竄出踞連鎮夾運河托明阿與都統西凌阿軍東西兩岸圍復會琦善督師揚州卒於軍命托明阿爲欽差大臣馳往代之授江甯將軍自賊踞江甯鎮江揚州皆陷南北梗阻大軍分兩路向榮軍江南琦善軍江北江北軍攻揚州不能克賊棄城去聚於瓜州與南岸鎮江相犄角江甯賊時乘鉅艦順流而下陸師不能扼水師力薄亦不能制賊上游浦口最當衝要賊於沙洲結營時圍進

竄恃總兵武慶一軍及道員溫紹原六合練勇爲屏蔽亦不能進取托明阿至軍令副將鞠殿華毀運河鐵鑿提督陳金綬循東岸進攻小有斬獲又截擊賊輝斃僞丞相黃起茅自督舟師渡江略北固山金山而還五年瓜洲鎮江賊合犯儀徵令副都統德興阿總兵李志和擊退又進軍三汊河誘賊敗之托明阿見僧格林沁於連鎮馮官屯皆以圍堵制賊議仿其法於瓜洲築長圍以困之然瓜洲濱大江江路不斷且地勢袤長不易守實無足恃圍成屢借陳金綬進攻無大勝利江甯賊踞江浦石磯橋武慶西昌阿等馳擊克之巡撫吉爾杭阿督師攻鎮江甚急於是議南北同時進勦六年二月江甯賊大舉援鎮江未得逞渡江與瓜洲賊合突越土圍四出縱火官軍戰土橋竟日傷亡多托明阿營壘被燬退三汊河又退秦家橋幾不能軍陳金綬雷以誠等亦退走揚州遂陷諸營潰散惟德興阿猶整軍力戰向榮遣鄧紹良渡江來援越十日復揚州而江浦亦爲賊踞詔褫托明阿職留營効力尋以病歸八年予頭等待衛率兵駐楊村防英兵內犯授直隸提督遼西安將軍同治元年以傷病乞休四年卒陳

金綬四川岳池人從勦教匪授把總積功至都司道光初從征回疆破賊於佳
噶賴功最賜號逸勇巴圖魯擢留壩管游擊十三年直隸總督琦善調司教練
累擢督標中軍副將琦善倚之以堪勝總兵薦擢天津鎮二十二年擢直隸提
督及琦善督師勦粵匪率所部三千以從詔金綬爲楊遇春舊部命幫辦軍務
率兵先發又以其不諳文字命勝保偕行咸豐三年春趨援江寧偕勝保克浦
口詔責專防江北揚州陷由六合儀徵趨援琦善大軍始至合攻揚州琦善軍
其北金綬勝保軍其西累戰皆捷賊堅守數月不下而瓜洲一路通江兵少不
能合圍賊分犯浦口踞之進陷滁州遂北竄勝保率兵赴安徽援應迭詔以孤
城久抗責攻益急總兵雙來奮進緣梯登城金綬策應兵不聽命雙來以無援
負創退尋歿於軍自此不敢力攻而賊時由瓜洲窺伺來援屢却之十一月賊
陷儀徵兩路同時來犯參將馮景尼守楊子橋先潰諸軍多失利城賊擁輜重
突出趨瓜洲琦善金綬不能截擊並坐視職留軍揚州雖復賊久踞瓜洲四年
春琦善卒於軍金綬暫署關防托明阿至偕金綬進攻瓜洲毀賊礮臺尋攻新

橋賊呈金綬之姪能義及游擊海明殞於陣江北軍多疲玩金綬年老文宗以其謹愿姑容之閱時輒報小捷屢以虛飾被斥至托明阿兵潰土橋金綬及雷以誠駐萬福橋望風而走事後飾辭自辨又奏隨同克復揚州爲德興阿論劾應治罪金綬已先歿於軍矣

德興阿喬佳氏滿洲正黃旗人黑龍江駐防道光末由駐京前鋒授藍翎侍衛乾清門行走累擢頭等侍衛以善騎射受文宗知曾手禽奔馬賜黃馬褂咸豐二年命率黑龍江兵赴琦善軍三年從攻揚州屯蔣家廟爲通儀徵要路城賊竄出奮擊敗之瓜洲援賊進踞虹橋與守備毛三元夾擊於三汊河德興阿單騎陷陣射殪其酋大破賊加副都統銜別賊破儀徵分兩路來犯德興阿急趨東石人頭毀賊浮橋而瓜洲賊又進築土城於西河偪三汊河與儀徵賊相犄角德興阿偕總兵瞿騰龍渡河毀賊營賊乃不能西進是年冬賊棄揚州城退踞瓜洲官軍進復儀徵授正白旗漢軍副都統四年偕瞿騰龍進攻瓜洲騰龍深入爲賊所襲殞於陣德興阿率勁騎馳援賊敗走軍賴以全賜號博奇巴圖

魯尋復敗賊三汊河賊埋地雷誘官軍德興阿偵知揮軍繞路而前賊伏壘不出遂分軍兩路夾攻斬截過當奪獲大礮地雷捷聞晉御前侍衛五年迭攻瓜洲賊壘又截擊竄賊於虹橋入江口等處皆獲勝六年托明阿兵敗於土橋揚州復陷諸軍渙散獨德興阿軍未動詔黜托明阿以德興阿爲欽差大臣加都統銜敗賊薛家樓進規郡城賊萬人迎敵德興阿身先士卒斬賊酋一諸軍乘之賊大潰乘勝復揚州同時江浦浦口並爲賊踞令總兵武慶攻克之德興阿戰功素爲江北諸軍冠惟不曉漢文命少詹事翁同書爲幫辦添調新兵軍聲稍振進規瓜洲七年參將富明阿破賊於土橋四里鋪水師又擊沈賊船斬僞將軍陳磊是年夏合水陸諸軍進攻毀賊艦及礮臺德興阿親督戰更番進逼至十一月大破之復瓜洲賊負嵎歷四年至是始克詔嘉調度有方賜雙眼花翎予騎都尉世職乘勝逼金山勦平新河口龍王廟等處餘匪江南軍亦同日克鎮江專力進攻江甯八年春德興阿進軍江浦獲勝江甯賊勢日蹙悍黨陳玉成等由安徽糾衆來援德興阿兵敗於浦口退保六合礮雙眼花翎革職留

任賊連陷江浦天長儀徵德興阿不能救揚州亦陷視世職尋張國樑率兵渡江復揚州而德興阿擁兵邵伯觀望不前嚴旨斥責溫紹原守六合歷數年爲江北屏蔽至是亦以援絕被陷紹原死之翌日而張國樑馳至已無及國樑以江甯軍事急移軍渡江詔責德興阿規復六合軍已不振迄無功何桂清疏劾德興阿秉性粗率初賴翁同書相助得克瓜洲自同書調任安徽巡撫去後左右無人毫無謀略貽誤軍事和春亦劾其舉動乖謬難以圖功文宗猶念其前勞未遽加譴九年以圍攻六合久不下革任召還自此江北不置帥軍務統歸和春節制尋予六品頂戴交僧格林沁差遣十一年署密雲副都統同治初授西安右翼副都統留辦山西防務又移駐陝西同朝一帶防勦五年充塔爾巴哈臺參贊大臣授正紅旗漢軍副都統幫辦新疆北路軍務六年丁母憂回旗尋卒依都統例賜卹設威格

論曰勝保初以直諫稱及出治軍膽略機警數著功績然負氣凌人雖僧格林沁不相下自餘疆臣共事無不齟齬互劾文宗殿馭之屢蹟屢起蓋惜其才也

始終以客軍辦賊無自練之兵無治餉之權撫用悍寇而紊紀律濫收廢員而通賄賂又縱淫侈不自檢束卒因袒庇苗沛霖與楚軍不相能朝廷苦心調和而不之喻遂致獲罪功過固莫掩也托明阿德興阿皆戰將非獨當一面之才負乘值事宜哉斯又不足與勝保並論矣

清史稿

列傳一百九十一

僧格林沁

字克勤 蒙古 錫林郭勒盟 正黃旗 貝勒 阿拉坦 色布騰 孫

僧格林沁博爾濟吉特氏蒙古科爾沁旗人本生父畢啓四等台吉追封貝勒族父索特納木多布齋尙仁宗女公主無出宣宗爲選於族衆見僧格林沁儀表非常立爲嗣道光五年襲封科爾沁札薩克多羅郡王爵十四年授御前大臣補正白旗領侍衛內大臣正藍旗蒙古都統總理行營調鎮白旗滿洲都統出入禁闈最被恩眷咸豐三年粵匪林鳳祥李開方等北犯命僧格林沁偕左都御史花沙納等專辦京師團防八月欽差大臣訥爾經額師潰臨洛關賊竄正定詔授惠親王綿愉爲奉命大將軍僧格林沁爲參贊大臣上御乾清宮親頒關防賜納庫素光刀命率京兵駐防涿州十月賊陷靜海窺天津兵進永清又進王家口賊不得前乃踞獨流鎮四年正月僧格林沁會欽差大臣勝保軍乘夜越濠燔其壘賊西南逸追擊之子牙鎮南禽斬甚衆賜號湍多巴圖魯復連敗賊於河間束城村獻縣單家橋交河富莊驛賊竄踞阜城縣城附城卹堡

皆爲賊屯。僧格林沁借勝保率副都統達洪阿、侍郎瑞麟將軍善祿等諸軍圍擊毀堆村、連村、杜場諸賊屯。礮聲悍，曾吉文元賊猶頑抗。攻之累月，不下。粵匪復自江北豐縣渡河擾山東。近直隸境，欲以牽掣大軍。勝保及善祿先後分兵迎勦。迭詔責僧格林沁速攻阜城。於是穴地爲重濠，長圍困之。四月，賊乘風突圍出竄。東光連鎮、連鎮、跨連河分東西兩鎮，村落相錯，賊悉踞之。僧格林沁自率西凌阿屯河東，令托明阿屯河西，別遣馬隊扼桑園。會勝保已破賊山東，回軍合攻連鎮。五月，賊酋李開方以馬隊二千餘由連鎮東突出，趨山東勝保。率騎兵追之，遂竄踞高唐州。詔斥僧格林沁疏防，責速攻連鎮。自贖會霖兩河漲，賊聚高阜，官軍屯窪地，勢甚棘。於是議開濠築隄，以水灌賊營。隄成，蓄水勢如建瓴，賊大困。屢出撲，皆擊退。九月，東西鎮各出賊數千，欲突圍而竄。爲官軍所扼，糧盡，勢蹙。附近村莊皆收復。合力急攻，凡數十戰。十二月，斃僞檢點黃某。悍黨詹啟綸出降。焚西連鎮賊巢，僅餘死黨二千餘人。以大礮環擊。五年正月，破東連鎮木城，賊冒死衝突，盡殲之。禽林鳳祥，檻送京師，誅之。畿輔肅清，錫封。

僧格林沁爲博多勒噶台親王擢其子二等侍衛伯彥訥謨祜御前行走敕移師赴高唐州督辦軍務先是勝保圍攻高唐久不下密詔僧格林沁查辦至即効罷之賊聞連鎮既下喪膽欲遁大軍數日即至故疏其防賊果乘隙夜走親率五百騎追奔五十里至荏平馮官屯賊踞以守合軍圍攻四面礮擊賊掘地爲濠盤旋三匝穴堀潛藏穿孔伺擊攻者傷亡甚多復議用水攻挑河築壩引徒駭河水灌之賊屢衝突皆擊退四月水入賊窖紛紛出降禽李開方及其死黨黃懿端等八名械送京師誅之北路蕩平又宗大悅加恩世襲親王罔替五月凱撤回京上御養心殿行抱見禮賜朝珠及四團龍補褂又御乾清宮恭繳參贊大臣關防賜宴勤政殿從征將士文武大臣並預焉林鳳祥李開方爲粵匪悍賊狡很善戰兩年之中大小數百戰全數殄滅無一漏網僧格林沁威名震於海內時英吉利在粵東開釁乘東南軍事方棘多所要挾每思北犯故近歲肅清後命西凌阿分得勝之師赴援湖北而僧格林沁遂留京師六年丁本生母憂予假百日在京持服尋調正黃旗領侍衛內大臣七年四月英吉利兵

船至天津海口命僧格林沁爲欽差大臣督辦軍務駐通州托明阿屯楊村督前路倉猝徵調兵難驟集敵兵已佔海口礮臺闖入內河議掘南北運河洩水以阻陸路別遣議和大臣桂良花沙納赴天津與議條約五月議粗定英兵退未盡事宜桂良等赴上海詳議於是籌議海防命僧格林沁赴天津勘築雙港大沽礮臺增設水師以瑞麟爲直隸總督襄理其事奏請提督每年二月至十月駐大沽自天津至山海關海口北塘蘆臺河口蒲河口秦皇島石河口各礮臺一律興修九年桂良等在上海議不得要領五月英法兵船犯天津毀海口防具駛至雞心灘轟擊礮臺提督史榮椿中礮死別以步隊登岸僧格林沁督軍力戰大挫之毀敵船入內河者十三艘持數日敵船引去九年六月英法俄美四國兵百餘艘復來犯知大沽防禦嚴固別於北塘登岸我軍失利敵以馬步萬人分撲新河軍糧城進陷唐兒沽僧格林沁力扼大沽兩岸文宗手諭曰天下根本在京師當迅守津郡萬不可寄身命於礮臺若不念大局只了一身之計有負朕心蓋知其忠憤慮以身殉也尋於右岸迎戰失利礮臺被陷提

督樂善死之僧格林沁退守通州奪三眼花翎領侍衛內大臣及都統迭命大臣議和不就敵兵日進迎擊獲英人巴夏禮送京師戰於通州八里橋敗績瑞麟又敗於安定門外聯軍遂入京文宗先幸熱河圓明園被燬詔禪僧格林沁爵職仍留欽差大臣九月和議成命遣撤殘軍馳赴行在未行會畿南土匪蜂起山東捻匪猖肆復僧格林沁郡王爵命偕瑞麟往剿師至河間匪多解散詔促赴濟甯兗州督師十一月至濟甯賊已他竄回巢疏陳軍事略曰捻首張洛行龔瞎子孫葵心等各聚匪黨無數此外大小頭目人數不少每年數次出巢打糧輒向無兵處所迨官兵往剿業經飽掠而歸所至搶擄貨財糧米村舍燒爲赤地殺害老弱裹脅少壯不從逆亦無家可歸故出巢一次即增添人數無算此捻匪衆多之情形也匪巢四面一二百里外村莊焚燒無存井亦填塞官兵裹糧帶水何能與之久持一經撤退匪踪緊蹙往往因之失利此各路官兵僅能堵禦不能進攻之情形也每次出巢馬步數十萬列隊百餘里兵賊衆寡懸殊任其猖獗無可如何前此粵捻各樹旗幟近年彼此相通聯爲一氣官

兵在北粵匪在南擒匪居中以爲粵匪屏蔽若厚集兵力分投進剿擒匪一經受創粵匪奮動非竭力相助即另圖北犯以分我兵勢此剿擒不易之情形也臣原帶馬步六千緝調陝甘山東綠營及青州旅兵共一萬二千餘人擬俟齊集會合傅振邦德楞泰二軍相機直擣老巢疏入詔擒匪正圖北犯應坐鎮山東以杜窺伺毋輕舉以誤全局尋擒匪由徐州北竄迎擊於鉅野羊山親率西凌阿國瑞當其東瑞麟及副都統格綳額當其西殺賊甚衆而格綳額陣亡瑞麟傷退効能之薦西凌阿國瑞幫辦軍務又効剛練大臣杜翻不能禦賊供應擾民罷其任剛練歸巡撫督辦鄒縣教匪宋紹明集衆數千戕官令國瑞西凌阿擊剿解散十一年擒匪五旗並出僧格林沁率諸將由金鄉迎剿遇賊於荷澤李家莊戰失利察哈爾總管伊什旺布陣亡回師駐唐家口二月令西凌阿馳赴汶上會都統伊興額總兵滕家勝追賊至楊柳集戰歿僧格林沁親駐汶上令西凌阿回守濟甯賊由沙溝渡運河盤踞東平汶上德楞額追擊於小汶河北岸破之賊始東竄四月令舒通額進剿解滕縣圍德楞額克沙溝營臨城

驛賊分兩路奔竄其入曹州境者勾結長槍會匪擾鄆城鉅野令知府趙康侯集諸縣鄉團禦之教匪宋繼明復糾衆踞鄒縣鳳凰山令國瑞德榜額攻之連破賊圩繼明尋遁走乞撫六月親赴曹州進剿會匪連破之於曹縣安陵集濮州田潭禽其渠李燦祥陳懷五等八月擒匪渡運河犯泰安濟南僧格林沁親率大軍追躡敗之於孫家鎮賊走青州九月襲擊於臨朐縣南沿諸城至沂水黑旗捻黨跨河抗拒分兵擊之追及蘭山蘭溪鎮殲焉捷聞復御前大臣賞還黃纓授正紅旗漢軍都統管理奉宸苑穆宗即位特詔嘉其勤勞復博多勒噶台親王爵是年冬會東軍攻曹郡會匪破濮州紅川口賊圩搜斬無遺毀劉家橋郭家唐房賊巢又破定陶賊於大張寺復范縣西凌阿等攻擒匪於鉅野境大捷定陶踞匪聞風遁走會匪郭秉鈞自河西來犯連擊之於崔家場至黃河南岸屢挫賊鋒曹郡漸清疏陳軍事略曰擒匪老巢多在宿州蒙城亳州境內其北來每由歸德之虞永夏徐州之豐沛蕭錫直入山東之曹單魚臺或由宿徐北至韓莊八閘今領重兵進駐亳州偏於西南一隅北至徐州三百餘里再

東更慮鞭長莫及如派隊輪轉由西路進攻賊圩即使得手距亳州尙遠東路
擒衆豈能坐待勢必由豐碭韓莊鈔襲我軍之後我軍不得不回顧北路一經
移動則亳州之賊尾隨受其牽掣故屯兵亳州之議在豫省爲良策若欲衛東
省兼顧北路藩籬則未可行也臣擬俟曹屬肅清移營單縣觀皖捻動靜剿撫
兼施鄒縣教匪踞險難攻暫准投誠以示羈縻留兵鎮壓待南捻稍鬆相機辦
理滕嶧之匪德榜額招安劉雙印牛際堂等若有反側仍應往剿河北教捻各
匪本年兩次貽張衆不過一二萬臣令西凌阿國瑞兩次會勦勝保等方能得
手勝保於此匪尙不能獨力剿除豈能當十餘萬之擒衆壽張及曹屬一帶臣
已辦理就緒毋須勝保前來會剿疏上詔從之同治元年正月擒匪二萬餘由
江北豐縣犯金鄉魚臺令翼長蘇克金擊走之二月亳擒張洛行合長槍會匪
西竄勢甚張僧格林沁率馬隊追至河南杞縣許岡賊列隊橫亙十餘里蘇克
金等奮擊斃賊二千餘西路援賊至豫軍亦來會剿嬰城而守連日鏖戰以馬
隊伏濠邊伺賊懈城中突出勁騎衝賊營伏赴夾擊毀賊壘七斬敵千餘越日

余際昌率步隊至與蘇克金合擊衝賊爲兩追殺二千餘於是先破趙圩賊寨
合攻焦寨援賊數至皆擊卻賊宵遁是役三路合剿殲匪萬餘捷聞特詔褒獎
僧格林沁督率諸將窮追竄匪破之於尉氏東賊踞民寨堅守圍攻之旋慮東
面誘之出至樊家樓盡殲焉五月補正黃旗領侍衛內大臣長槍匪黨董智信
竄東明蘇克金馳剿受降營總富和破坦頭集擒集招撫被脅數十圩寨恒齡
破焦桂昌於曹州乞降誅之六月進攻商邱金樓寨教匪郝姚氏及金鳴亭久
踞金樓其黨尤本立常立身尤兇悍官軍屢攻不克僧格林沁先遣謀用間諭
令投誠金鳴亭潛允降而不出其子線駒居郭家老寨密捕之會有賊黨通教
匪以鳴亭稟詞示常立身立身遂殺鳴亭賊中自相疑忌至是合兵進攻游擊
許得等率降人爲導先攻入大軍繼之巷戰斬郝姚氏及其兩子常立身尤本
立楊玉聰同授首餘賊盡殲夷其寨乘勢連破援賊於邢家圩吳家廟營廓集
前鋒直抵亳州境僧格林沁移駐夏邑疏陳將帥市恩麾下督撫見好屬員保
舉冗濫吏治廢弛州縣捏災私徵軍餉不足言甚切至詔嘉其公忠命統轄山

東河南軍務並直隸山西四省督撫提鎮統兵大員均歸節制八月令恒齡卓明阿等追擒匪姜台凌至裕州博望驛大破之餘衆遁入山別股李城趙浩然等乘大軍分隊西行糾衆擾永城復由碭山北竄副都統色爾圖喜追至魚臺羅家屯戰不利僧格林沁促恒齡等回援親督進戰於鉅野滿家洞令馬隊誘賊深入回擊之恒齡國瑞分合衝突斃賊數千復連敗之於子山集賊東南竄毫北白旗擒首李廷彥以邢大莊爲老巢附近賊圩互相首尾九月僧格林沁自攻盧廟令國瑞恒齡攻邢大莊及張大莊廷彥見事急詐稱投誠誘山誅之黨羽多乞降惟孫老莊匪首孫彩蘭不肯出令降匪李懋奇爲導攻入寨禽斬彩蘭諸寨皆下毫東黑旗擒首宋喜沅因與蘇添柏相仇殺諸悍黨攻破王大莊劉大莊兩寨來降諸小寨頭目聞風歸順毫北肅清於是諸擒擒震兵威多思反正二年正月馬林橋唐家寨張家瓦房孟家樓童溝集諸賊巢先後剿平著名擒首魏喜元蘇添才趙浩然李大箇子田現李城等或降或遁張洛行爲巨憨首惡見勢敗時思竄逸會孫醜劉大劉二楊二等由鹿邑西竄令舒通額

蘇克金等追之戰於魏橋殲戮甚衆洛行欲由宿州趨徐州爲知州英翰所截又聞西路諸匪被創洛行遂潛回雒河集老巢尹家溝白龍廟與雒河集爲犄角二月令舒通額等進攻尹家溝賊出撲擊潰遂攻雒河集洛行夜遁追至灑河北岸拒戰殲賊過千禽斬擒首韓四萬等逸匪多潛匿各莊寨分軍駐索西洋寨擒首李勤邦投誠誘禽張洛行及其子張憲以獻磔之擒匪自蒙毫創亂已歷十年至是掃除詔嘉僧格林沁謀勇兼備加恩仍以親王世襲罔替並准服用上賜章服以示優異時北路竄捻與教會各匪勾結肆擾僧格林沁回師令恒齡蘇克金馳赴直東交界會剿自剿淄川踞匪劉德培六月賊傾巢出撲追敗之於田莊遂克縣城德培遁大白山禽斬之進攻鄒縣白蓮池匪首宋繼明屢降屢叛擁衆二萬餘恃險抗拒令總兵陳國瑞郭寶昌猛攻破其山寨敗竄紅山死守經月糧盡欲遁令舒通額等設伏嶺下陳國瑞於山北攻上焚其寨殺賊過半其竄山下者伏起並殲禽匪首李九獲宋繼明屍及其家屬留國瑞暫駐搜緝餘匪即日令陳國瑞赴皖剿苗沛霖沛霖偏強准北當張洛行伏

誅懼請散練歸農及僧格林沁北行又襲攻蚌埠懷遠壽州圍蒙城皖軍不能制至是僧格林沁督軍討之陳國瑞先至連戰皆捷匪黨喪膽十月大軍進毫州連克蔣集楊家寨與陳國瑞合攻絕其糧道破蔡家圩淮河兩岸賊壘悉盡沛霖昏夜越濠出竄爲其黨刺殺總兵王萬清斬首以獻逆黨苗愷開等均伏法尋破西洋集禽匪首葛春元賴毫壽境圩寨悉定淮甸漸清時擒匪張洛行之姪總愚擾河南令蘇克金率馬隊往會剿而降擒李世忠官至江南提督素跋扈盤踞淮南將爲隱患詔曾國藩密爲處置命僧格林沁駐軍鎮攝三年春世忠自請解兵柄會漢南粵捻諸匪糾合下竄與張總愚相應接將圖南犯爲江甯踞賊聲援僧格林沁乃督師赴許州進南陽與河南湖北諸軍會剿迭破賊於信陽應山鄖陽之間六月江甯克復大賚諸軍詔嘉僧格林沁轉戰勳勳加一貝勒命其子伯彥訥謨祜受封復以所部蒙古馬隊最得力保舉素無冒濫命擇尤奏獎賞兵丁銀一萬兩七月粵捻諸匪廣聚麻城令蘇克金張曜英翰等分路進擊破賊壘數十捻首陳德才以萬衆來撲戰於紅石堰蘇克金力

戰殲賊甚衆，遽病，賜卒以成。保代之賊竄麻城南境，閔家集結壘爲固。成保攻破之，總兵郭寶昌克蔡家，賊竄河南光山。羅山僧格林沁親督馬隊追擊，戰於蕭家河，援賊大至，稻隴地狹，馬隊失利，自翼長舒通額以下陣亡。將領十二人八月復戰於光山柳林寨，先勝中伏，爲賊所圍，力戰始退。總兵巴揚阿死之。九月，張總愚東竄，與上巴河蘄州之賊勾合，踞風火山。僧格林沁會鄂軍進剿，連戰破之。賊趨安徽境，分竄潛山太湖英山。十月，連破之於土漠河樂兒嶺陶家河。匪目黃中庸率千人來降，追至黑石渡，令黃中庸爲前鋒，襲賊營。大軍繼之，衝賊爲兩段。賊目溫其玉等率九千餘人投械乞降，偵知賊分三路遣兵分剿。擒首馬融和率黨七萬人投誠，願爲前敵。賊黨甘懷德誘禽僞端王藍成春出獻，磔於軍前。餘黨汪傳第吳青泉吳青泰范立川等各率衆乞撫，先後受降十數萬人。著名匪首僅存數人，陳得才尋亦窮蹙，自盡。惟張總愚陳大憲西竄河南湖北境，復猖獗。十一月，僧格林沁督軍追剿，敗之於光山境。進至棗陽粵匪賴汝洸邱元才擒匪牛洛紅任柱李允等竄襄陽黃龍壩嶺山官軍進擊。

小挫而張總愚陳大喜乘間與合圍犯樊城大軍追擊於鄧州唐坡賊頓巢出
撲兩面包鈔官軍失利傷亡甚多僧格林沁自請嚴讓詔寬之乃駐軍南陽十
二月賊由南召魯山竄踞寶豐張八橋大軍進逼令郭寶昌何建鼐分南北兩
路恒齡成保以馬隊護之北路逼賊而營賊來撲成保橫出鈔襲乘勝壓過山
岡南路誘賊深入從旁更番進擊兩路皆捷合軍追擊直抵張八橋賊夜遁入
山北趨河洛僧格林沁督軍由洛陽取道宜陽駐韓城鎮四年正月賊折而南
犯魯山大軍追及戰於城下前鋒得利窮追後路爲賊鈔襲翼長恒齡等陣亡
舒倫保常順馬隊接應陳國瑞橫突扼橋上始得全師退而舒倫保常順亦以
傷殞賊遂竄葉縣襄城陳國瑞乘雪夜襲攻縱火焚之賊東北竄新鄭尉氏追
及於雙溪河翼長諾林丕勒等擊走之賊南趨由臨潁郟城擾西平襄魯愈衆
遂犯汝寧二月僧格林沁進抵汝甯賊由息縣羅山竄信陽大軍抵信陽賊又
北竄追至確山陳國瑞等步隊亦到令與全順何建鼐常星阿成保數路合擊
郭寶昌設伏山口僧格林沁登山督戰諸悍賊齊集合力死鬪國瑞鏖戰最力

寶昌伏起衝突賊大收屍橫徧野由遂平西平鄆城許州扶溝直走睢州官軍追至又奔入山東境渡連河至甯陽折向曲阜官軍馳追而月日行百里往返三千餘里馬力久疲自蘇克金舒通額恒齡等歿後得力戰將漸稀朝命先調湘淮軍著名兵將多觀望不至僧格林沁亦不願用之至是匪蹤剽忽盤旋於兗沂曹濟之間由汶上竄鄆城水套旬結伏莽衆至數萬僧格林沁督師猛進再戰再捷至曹州北高莊賊拒戰軍分三路合擊皆挫敗退紫荒莊遂被圍兵不得食夜半突圍亂戰昏黑不辨行至吳家店從騎半沒僧格林沁抽佩刀當賊馬蹶遇害時四月二十四日也內閣學士全順總兵何建慈同殉於陣事聞兩宮震悼詔嘉其忠勇性成視國事如家事節終典禮視親王從優議卹命侍衛馳驛迎柩至京上奉兩宮皇太后親奠賜金治喪祀昭忠祠於立功地方建專祠配享太廟設曰忠預繪像紫光閣七年檢平遣官賜祭一壇光緒十五年皇太后歸政敕於京師安定門內建專祠祠曰顯忠子伯彥訥謨帖襲親王府孫那爾蘇襲封貝勒次孫溫都蘇封輔國公僧格林沁所部騎兵最號勁旅驍

將以舒通額恒齡蘇克金爲最均先殞及從難僅全順何建鼉二人兩次治海防倚提督史榮椿樂善先後死事焉其將勇營者陳國瑞郭寶昌最有名並自有傳舒通額蘇里氏滿洲鑲白旗人齊齊哈爾達呼爾咸豐三年以領催從軍江北隸德興阿部下攻江浦矢殫黃衣執纛賊迭著戰功洊升協領賜號圖薩泰巴圖魯九年僧格林沁督師天津調充馬隊管總十年冬從赴山東勦擒匪擒首趙浩然犯濟甯舒通額敗之羊山十一年春戰於荷澤李家莊分三路進擊不利舒通額將右翼獨殺賊多全師而退擢充翼長敗賊於泰安甯陽解滕縣圍擒竄豐沛阻於水復折而西分竄鉅野合長槍會匪甚張舒通額破之斬敵數千擊會匪郭秉鈞劉占考於城武柳林集復破賊徐官莊偕協領色爾固善敗擒匪於郟城紅花埠馬陵山禽賊首李燦潭於曹州安陵集復破郭秉鈞田潭老巢追剿擒匪於青沂之間累功記名副都統加頭品頂戴賜黃馬褂敗擒匪劉添祥於滕縣岡山敗會匪劉占考於范縣又破劉添祥於曹州袁家園同治元年授阿勒楚喀副都統從剿商邱金樓寨教匪克之偕恒齡平亳州張

大莊擒巢借蘇克金敗擒魁張洛行於張橋二年擒匪劉狗孫醜犯鹿邑復與蘇克金要擊於魏橋破尹家溝雉河集賊巢張洛行就禽六月擒首張守義陷淄川他軍戰不利舒通額突擊之衝賊爲四守義棄城遁入鳳凰山白蓮池寨與李成宋繼明劉雙印合衆二萬餘負嶠抗拒舒通額攻其北奪西寨門棗園諸隘總兵陳國瑞由東南登山縱火焚之繼明自殺餘賊奔潰舒通額覆諸山下俘斬數千擢正黃旗漢軍都統從剿苗沛霖平之三年粵擒諸匪合擾豫皖楚三省間八月追至羅山賊退蕭家河舒通額躡其後悍黨四面至援軍阻絕騎兵不得馳騁舒通額下馬持短刀搏鬪突圍不出遂戰死優卹予騎都尉兼雲騎尉世職諡威毅恒齡郭貝爾氏滿洲鎮黃旗人呼倫貝爾達呼爾咸豐九年以佐領從提督傅振邦剿擒匪破賊於夏邑李家窪勇常冠軍擢協領十年振邦遣率兵千五百人入衛京畿尋從巡撫文煜折回山東剿擒解濟甯圍遂從僧格林沁充管總十一年迭敗賊於東昌青州沂州積功記名副都統賜黃馬褂達春巴圖魯名號是年冬會匪劉占考竄范縣副都統舒明阿戰死恒齡

突擊走之援賊至賊返鬪恒齡與舒通額夾擊追至巖箕官舒通額攻其圩恒齡逐逸賊至范縣西斬千餘級同治元年敗長槍會匪於曹州楊家集殲焦桂昌侍郎國瑞攻亳州邢大莊不下恒齡夜襲克之二年偕舒通額破捻匪於鹿邑魏橋偕侍衛卓明阿敗賊於杞縣許岡圍其寨賊三路來援偕蘇克金卓明阿分擊斬賊二千又追敗之於博望驛賊走山東恒齡回援大戰於鉅野大義渠賊翻山遁偕國瑞逐北殲五千人駐軍永城撫定亳北諸圩寨偕舒通額蘇克金毀渦河南北捻巢踞追至肥河北張洛行就禽伏誅時降捻張錫珠宋景詩復叛擾畿南恒齡偕蘇克金率馬隊馳援署直隸提督擊散張錫珠黨衆進剿宋景詩於堂邑三路合擊景詩遁走畿輔解嚴從僧格林沁剿苗沛霖奏充翼長會諸軍克蔡圩沛霖就殲三年從剿粵捻諸匪於河南湖北邊境破賊於隨州授正黃旗護軍統領迭戰麻城羅山間賊北趨恒齡與何建勳等敗之張八橋四年三月追賊抵魯山城下賊潮至恒齡將右翼與常星阿成保合蹙賊賊踰沙河走恒齡追之反鬪伏起殞於陣予騎都尉兼雲騎尉世職諡壯烈蘇

克金倭勒氏滿洲正黃旗人愛琿駐防咸豐初以驍騎校從僧格林沁剿粵匪克連鎮馮官屯積功擢佐領五年從都統西凌阿剿賊湖北克德安七年從副都統德楞額剿額上捻匪轉戰河南肅清河陝汝三郡擢協領加副都統銜八年阜陽教匪王廷楨擾洛陽新蔡蘇克金破西爐賊巢斃王廷楨於陣會德楞額疾代領所部追賊塞河集陳家阪盡殲之賜號伊固木圖巴圖魯邀擊捻匪於夏邑甯陵走之尋又自亳州竄入河南境收之鄧六莊坐赴援周家口失期革職留營尋破賊虞城復原官九年克睢州十年僧格林沁調充天津行營翼長遂從剿捻山東十一年從攻紅川口殲賊渠劉占考梁繼海賜黃馬褂記名副都統同治元年從剿張洛行於河南杞縣尉氏屢敗之攻金樓寨教匪先登斬郝姚氏及其二子授福州副都統二年偕舒通額敗捻匪於鹿邑魏橋破尹家溝賊巢禽捻首韓四萬陳二坎蒙辜悉不加頭品頂戴偕恒齡赴援畿輔駐防河間時河北多伏莽鄉團跋扈蘇克金附疆吏姑息所致言於僧格林沁勅之從剿苗沛霖克淮南北各圩寨餘捻走河南張總愚最狡悍三年僧格林沁

督師進剿令蘇克金先驅扼魯山賊畏大軍馬隊盤旋山地蘇克金在諸將中號持重善審地勢持數月未戰詔屢促之會張總愚出鄧州急起追擊連破之赤眉城雙橋安春寨總愚負傷遁而粵匪陳德才藍成春等由漢中回竄屬集麻城蘇克金偕皖豫諸軍進攻力戰兼旬敗賊壘數十七月戰於紅石堰蘇克金指揮列陣忽中隔疾作墜馬昇歸遽卒詔依都統例賜卹諡壯介何建繼漢軍鎮紅旗人由武舉補京營把總初從達洪阿赴廣西勦匪繼從僧格林沁戰阜城連鎮馮官屯積功擢守備回京營供職咸豐七年調赴河南從剿角子山捻匪阜陽教匪洵升游擊九年調守天津大沽擊退英國兵艦加副將銜及從剿捻匪轉戰山東江北以破曹州紅川口會匪擢副將殲亳州捻首李廷彥記名總兵平張洛行賜號雄勇巴圖魯授中營副將歷從剿捻豫楚之交常爲軍鋒曹州之敗兵分三路建繼當其西中路失利賊萃於建繼士卒多死退從僧格林沁守空堡短刀殺賊歿於陣詔嘉其至死不離主帥依提督例優卹予騎都尉兼雲騎尉世職諡果毅全順薩爾圖拉氏蒙古正藍旗人咸豐六年繙譯

進士歷官中九十年僧格林沁治防天津疏調從軍累遷翰林院侍讀學士在軍充翼長從剿商邱金樓蹇亳州邢大莊及平張洛行並著戰績賜黃馬褂擢內閣學士授西安左翼副都統從僧格林沁陣亡卹典加等依尙書例子騎都尉兼雲騎尉世職諡忠壯舒通額恒齡蘇克金何建鼉全順並附祀僧格林沁專祠史榮椿順天大興人由行伍洊升京營參將歷從揚威將軍奕經大學士賽尙阿軍中繼從都統勝保剿粵匪攻獨流賊壘戰阜城破賊堆村賜號治希巴圖魯僧格林沁薦其堪膺專閫咸豐五年擢大名鎮總兵洎近畿軍事平都統西凌阿率師移剿湖北留馬隊千五百人隸榮椿防畿輔尋赴援河南安徽連破捻匪於鹿邑歸德調徐州鎮破捻匪於宿州又平亳州捻巢八年破捻匪於渦河南賊首劉狗乞降誅之擢直隸提督從僧格林沁治天津海防九年英國兵艦犯海口榮椿偕大沽協副將龍汝元力戰中礮同歿於陣予騎都尉兼雲騎尉世職建專祠諡忠壯樂善伊勒忒氏蒙古正白旗人由拜唐阿洊升雲麾使揀發陝甘參將剿番匪有功從勝保剿粵匪戰獨流阜城賜號巴克敦巴

圖魯咸豐六年率馬隊剿捻匪河南連破賊於鹿邑潁川七年擢河北鎮總兵克方家集捻巢從勝保克正陽關解固始圍賜黃馬褂九年命赴僧格林沁天津軍營擢直隸提督英兵闖入海口樂善扼擊敵不得逞尋退去論功最被優敘十年七月英兵復至大沽礮臺陷樂善力戰死之贈太子少保子騎都尉兼雲騎尉世職於海口建專祠諡威毅尋封二等男爵子成友襲

論曰僧格林沁忠勇樸誠出於天性名震寰寓朝廷倚爲長城治軍公廉無私部曲誠服勞而不怨其殄寇也惟以殺敵致果無畏難趨避之心剿捻凡五年掃穴禽渠餘孽遂爲流寇困獸之鬪勢更棘焉繼事者變通戰略以持重藏功則僧格林沁所未暇計及者也然燕齊皖豫之間諷思久而不沫於以見功德入人之深有清藩部建大勳者惟僧格林沁及策凌二人同膺侑廟曠典後先輝映旂常增色矣

清史稿

列傳一百九十二

曾國藩

曾國藩初名子城字瀚生湖南湘鄉人家世農祖玉屏始慕儒學父麟書爲縣學生以孝聞國藩道光十八年進士二十三年以檢討典試四川再轉侍讀累遷內閣學士禮部侍郎署兵部時太常寺卿唐鑑講學京師國藩與倭仁吳廷棟何桂珍殿事之治義理之學兼友梅曾亮及邵懿辰劉傳瑩諸人爲詞章考據尤留心天下人材咸豐初廣西兵事起詔羣臣言得失奏陳今日急務首在用人人才有轉移之道有培養之方有考察之法上稱其剴切明辨尋疏薦李棠階吳廷棟王慶雲嚴正基江忠源五人寇氛益熾復上言國用不足兵伍不精二者爲天下大患於歲入常額外誠不可別求搜刮之術增一分則民受一分之害至歲出之數兵餉爲鉅綠營兵額六十四萬常虛六七萬以資給軍用自乾隆中增兵議起歲糜帑二百餘萬其時大學士阿桂即憂其難繼嘉道間兩次議裁不及十之四仍宜汰五萬復舊額自古開國之初兵少而國強其後

兵愈多則力愈弱餉愈多則國愈貧應請皇上注意將才但使七十一鎮中有十餘鎮足爲心腹則緩急可恃矣又深痛內外臣工諂諛欺飾無陳善責難之風因上敬陳聖德預防流弊一疏切指帝躬有人所難言者上優詔答之歷署刑部吏部侍郎二年典試江西中途丁母憂歸三年粵寇破江甯據爲僞都分黨北犯河南直隸天下騷動而國藩已前奉旨辦團練於長沙初國藩欲疏請終制郭嵩燾曰公素具澄清之抱今不乘時自効如君父何且墨綬從戎古制也遂不復辭取明戚繼光遺法募農民樸實壯健者朝夕訓練之將領率用諸生統衆數不逾五百號湘勇騰書遐邇雖卑賤與鈞禮山野材智之士感其誠莫不往見人人皆以曾公可與言事四境土匪發聞警即以湘勇往立三等法不以煩府縣獄旬月中莠民稍背便宜捕斬二百餘人謗聞四起自巡撫司道下皆心誹之至以盛暑練操爲虐士然見所奏輒得褒答受主知未有以難也一日標兵與湘勇鬪至闌入國藩行臺國藩親訴諸巡撫巡撫漫謝之不爲理即日移營城外避標兵或曰曷以聞國藩歎曰大難未已吾人敢以私憤瀆君

父乎嘗與嵩燕忠源論東南形勢多阻水欲剿賊非治水師不可乃奏請造戰艦於衡州匠卒無曉船制者短棹長槳出自精思以人力勝風水遂成大小二百四十艦募水陸萬人水軍以褚汝航楊載福彭玉麟領之陸軍以塔齊布羅澤南領之賊自江西上竄再陷九江安慶忠源戰歿廬州吳文鎔督師黃州亦敗死漢陽失武昌戒嚴賊復乘勢擾湖南國藩銳欲討賊率水陸軍東下舟師初出湖大風損數十艘陸師至岳州前隊潰退引還長沙賊陷湘潭邀擊靖港又敗國藩憤投水幕下士章壽麟掖起之得不死而同時塔齊布大破賊湘潭國藩營長沙高峰寺重整軍實人人擲楡之或請增兵國藩曰吾水陸萬人非不多而遇賊即潰岳州之敗水師拒戰者惟載福一營湘潭之戰陸師塔齊布水師載福各兩營以此知兵貴精不貴多故諸葛敗祁山且謀減兵損食動求己過非虛言也且古人用兵先明功罪賞罰今世亂賢人君子皆潛伏吾以義聲倡導同履危亡諸公之初從我非以利動也故於法亦有難施其致敗由此諸將聞之皆服陸師既克湘潭巡撫提督上功而國藩譴罪上詰責提督鮑起

豹免其官以塔齊布代之受印日士民聚觀歎詔國藩爲知人而天子能明見
萬里也賊自岳州陷常德旋北走武昌再失國藩引兵趨岳州斬賊梟將曾天
養連戰下城陵磯會師金口謀取武昌澤南沿江東岸攻花園寇屯塔齊布伏
兵洪山載福舟師深入寇屯士皆露立不避鉛丸武昌漢陽賊望見官軍盛背
遁遂復二郡國藩以前靖港敗自請奪官至是奏上詔署湖北巡撫尋加兵部
侍郎銜解署任命督師東下當是時水師奮厲無前大破賊田家鎮斃賊數萬
至於九江前鋒薄湖口攻梅家州賊壘不下駛入鄱湖賊築壘湖口斷其後舟
不得出於是外江內湖阻絕外江戰船無小艇賊乘舢舨夜襲營擲火燒坐船
國藩跳而免水師遂大亂上疏請罪詔旨寬免謂於大局無傷也五年賊再陷
武漢擾荆襄國藩遣胡林翼等軍還援湖北塔齊布留攻九江而躬至南昌撫
定水師之困內湖者澤南從征江西復弋陽拔廣信破義甯而塔齊布卒於軍
國藩在江西與巡撫陳啟邁不相能澤南奔命往來上書國藩言東南大勢在
武昌請率所部授鄂國藩從之幕客劉善諫曰公所恃者塔羅今塔將軍亡羅

又遠行脫有急誰堪使者國藩曰吾計之熟矣東南大局宜如是俱困於此無爲也嵩叢祖饒澤南曰曾公兵單奈何澤南曰天苟不亡本朝公必不死九月補授兵部侍郎六年賊曾石達開由湖北竄江西連陷八府一州九江賊踞自如湖南北聲息不相聞國藩因南昌遣將分屯要地羽檄交馳不廢吟誦作水陸師得勝歌教軍士戰守技藝結管布陳之法歌者咸感奮以殺賊敢死爲榮願衆寡終不能大挫賊曠者爭請調澤南軍上以武漢功垂成不可棄澤南督戰益急卒死於軍玉麟聞江西警芒鞋走千里穿賊中至南昌助守林翼已爲湖北巡撫國藩弟國華國葆用父命乞師林翼將五千人攻瑞州湖南巡撫駱秉章亦資國荃兵援吉安兄弟皆會行間而國藩前所遣援湖北諸軍久之再克武漢直下九江李續賓八千人軍城東續賓者與弟續宜皆澤南高第弟子也載福戰船四百泊江兩岸江寧將軍都興阿馬隊鮑超步隊駐小池口凡數萬人國藩本以憂懼治軍自南昌迎勞見軍容甚盛登申做告誡之而是時江南大營潰督師向榮退守丹陽卒和春爲欽差大臣張國樞總統諸軍攻江甯

七年二月國藩聞父憂還歸給三月假治喪堅請終制允開侍郎缺林翼既定湖北進圍九江破湖口水師絕數年復合載福連拔望江東流揚颯過安慶克銅陵泥汊與江南軍通由是湘軍水師名天下林翼以此軍創始國藩揚彭皆其舊部請起國藩視師會九江克復石達開竄浙江浸及福建分股復犯江西朝旨詔國藩出辦浙江軍務國藩至江西屯建昌又詔援閩國藩以閩賊不足慮而景德地衝要遣將援贛南攻景德國荃追賊至浮梁江西列城次第復時石達開復竄湖南圍寶慶上慮四川且有變林翼亦以湖北餉倚川鹽而國藩又久治兵無疆寄乃與官文合疏請國藩援蜀會賊竄廣西上游兵事解而陳玉成再破廬州續寶戰歿三河林翼以羣盜蔓廬壽間終爲楚患乃改議留國藩合謀皖軍分三道各萬人國藩由宿松石牌規安慶多隆阿鮑超出太湖取桐城林翼自英山嚮舒六多隆阿等既大破賊小池復太湖潛山遂軍桐城國荃率諸軍圍安慶與桐城軍相犄角安慶未及下而皖南賊陷廣德襲破杭州李秀成大會羣賊建平分道援江南江南大營復潰常州蘇州相繼失咸豐十

年閏三月也左宗棠聞而歎曰此勝敗之轉機也江南諸軍將蹇兵疲久矣滌而清之庶幾後來可藉手乎或問誰可當者林翼曰朝廷以江南事付曾公天下不足平也於是天子慎選帥就加國藩兵部尙書銜署理兩江總督旋即眞授欽差大臣是時江浙賊氛熾或請撤安慶圍先所急國藩曰安慶一軍爲克金陵張本不可動也遂南渡江駐祁門江浙官紳告急書日數十至援蘇援滬援皖援鎮江詔書亦疊下國藩至祁門未數日賊陷甯國陷徽州東南方困兵革而英吉利復失好以兵至僧格林沁收績天津文宗狩熱河國藩聞警請提兵北上會和議成乃止其冬大爲賊困一出祁門東陷婺源一出祁門西陷景德一入羊棧嶺攻大營軍報絕不通將吏慄然有憂色固請移營江干就水師國藩曰無故退軍兵家所忌卒不從使人間行檄鮑超張運蘭亟引兵會身在軍中意氣自如時與賓佐酌酒論文自官京朝卽日記所言行後履危困無稍閒國藩駐祁門本資餉江西及景德失議者爭言取徽州通浙米乃自將大軍次休甯值大雨八營皆潰草遺屬寄家督死守休甯適宗棠大破賊樂平運道

通移駐東流多隆阿連敗賊桐城鮑超一軍游擊無定居林翼復遣將助之十一年八月國荃遂克安慶捷聞而文宗崩林翼亦卒穆宗即位太后垂簾聽政加國藩太子少保銜命節制江蘇安徽江西浙江四省國藩惶懼疏辭不允朝有大政咨而後行當是時偽天王洪秀全僭號踞金陵偽忠王李秀成等犯蘇滬偽侍王李世賢等陷浙杭偽輔王楊輔清等屯甯國偽康王汪海洋窺江西偽英王陳玉成屯廬州掠首苗需霖出入穎壽與玉成合圖竄山東河南衆皆號數十萬國藩與國荃策進取國荃曰急擄金陵則寇必以全力護巢穴而後蘇杭可圖也國藩然之乃以江甯事付國荃以浙江事付宗棠而以江蘇事付李鴻章鴻章故出國藩門以編修爲幕僚改道員至是令從淮上募勇八千選良將付之號淮軍同治元年拜協辦大學士督諸軍進討於是國荃有擄金陵之師鴻章有征蘇滬之師載福玉麟有肅清下游之師大江以北多隆阿有取廬州之師續宜有援穎州之師大江以南鮑超有攻甯國之師連蘭有防剿徽州之師宗棠有規復全浙之師十道並出皆受成於國藩賊之都金陵也堅築

據壘餉械足猝不可拔疾疫大作將士死亡山積幾不能軍國藩自以德薄請簡大臣馳赴軍俾分已責上優詔慰勉之謂天災流行豈卿一人之咎意者朝廷政多缺失我君臣當勉圖禳救爲民請命且瓊順中外才力氣量無逾卿者時勢艱難無稍懈也國藩讀詔感泣時洪秀全被圍久召李秀成蘇州李世賢浙江悉衆來援號六十萬圍雨花臺軍國荃拒戰六十四日解去三年五月水師克九洲江寧城合圍十月鴻章克蘇州四年二月宗棠克杭州國藩以江甯久不下請鴻章來會師未發國荃攻益急克之江甯平天子褒功加太子太傅封一等毅勇侯賞雙眼翎開國以來文臣封侯自是始朝野稱賀而國藩功成不居粥粥如畏穆宗每簡督撫輒密詢其人未敢指缺疏薦以謂疆臣既專征伐不當更分黜陟之柄外重內輕之漸不可不防初官軍積習深勝不讓敗不救國藩練湘軍謂必萬衆一心乃可辦賊故以忠誠倡天下其後又謂淮上風氣勁宜別立一軍湘勇利山徑馳騁平原非所長且川武十年氣亦稍衰矣故欲練淮士爲湘勇之繼至是東南大定裁湘軍進淮軍而捻匪事起捻匪者

始於山東游民相聚其後剽掠光固潁亳淮徐之間捻紙然脂故謂之捻有衆數十萬馬數萬蹂躪數千里分合不常捻首四人曰張總愚任柱牛洪賴文光自洪寇苗練營糾捻與官軍戰益悉攻鬪勝保袁甲三不能禦僧格林沁征討數年亦未能大創之國藩聞僧軍輕騎追賊一日夜三百餘里曰此於兵法必蹶上將軍未幾而王果戰歿曹州上聞大驚詔國藩速赴山東剿捻節制直隸山東河南三省而鴻章代爲總督廷旨日促出師國藩上言楚軍裁撤殆盡今調劉松山一軍及劉銘傳淮勇尙不足當更募徐州勇以楚軍之規模開齊兗之風氣又增募馬隊及黃河水師皆非旦夕可就直隸宜自籌防兵分守河岸不宜令河南之兵兼顧河北僧格林沁嘗周歷五省臣不能也如以徐州爲老營則山東之兗沂曹濟河南之歸陳江蘇之淮徐海安徽之廬鳳潁泗此十三府州責之臣而以其餘責各督撫汛地有專屬則軍務乃漸有歸宿又奏扼要駐軍臨淮關周家口濟甯徐州爲四鎮一處有急三處往援今賊已成流寇若賊流而我與之俱流必致疲於奔命故臣堅持初議以有定之兵制無定之寇

重迎剿不重尾追然督師年餘捻驍突如故將士皆謂不苦戰而苦奔逐乃起張秋抵清江築長牆馮運河禦之未成而捻竄襄鄧間因移而西修沙河買魯河開壕置守分地甫定而捻衝河南汛地復突而東時議頗咎國藩計迂闊然亦無他術可制捻也山東河南民習見僧格林沁戰皆怪國藩以督兵大臣安坐徐州謗議盈路國藩在軍久益慎用兵初立駐軍四鎮之議次設扼守黃運河之策既數爲言路所劾亦自以防河無効朝廷方起用國藩乃奏請鴻章以江督山駐徐州與魯撫會辦東路國荃以鄂撫出駐襄陽與豫撫會辦西路而自駐周家口策應之或又劾其驕妄於是國藩念權位不可久慮益有憂讒畏譏之心矣勾病假數月繼請開缺以散員留軍効力又請削封爵皆不許五年冬還任江南而鴻章代督軍時牛洪死張總愚竄陝西任柱賴文光竄湖北自是有東西捻之號六年就補大學士留治所東捻由河南竄登萊青李鴻章劉長佑建議合四省兵力堵運河賊復引而西越膠萊河南入海州官軍陣斬任柱賴文光走死揚州以東捻平加國藩雲騎尉世職西捻入陝後爲松山所敗

乘堅冰渡河竄山西入直隸犯保定天津松山繞出賊前破之於獻縣諸帥勦
王師大至賊越運河竄東昌武定鴻章移師德州河水盛漲扼河以困之國藩
遣黃翼升領水師助剿大破賊于茌平張總愚赴水死而西捻平凡防河之策
皆國藩本謀也是年授武英殿大學士調直隸總督國藩爲政務持大體規全
勢其策西事議先清隴寇而後出關籌演黔議以蜀湘二省爲根本皆初立一
議後數年卒如其說自西人入中國交涉事日繁金陵未下俄美英法皆請以
兵助國藩婉拒之及廷議購機輪置船械則力贊其成復建議選學童習藝歐
洲每定約章輒詔問可許不可許國藩以爲爭彼我之虛儀者可許其奪吾民
生計者勿許也既至直隸以練兵飭吏治河三端爲要務次第興革設清訟局
禮賢館政教大行九年四月天津民擊殺法領事豐大業燬教堂傷教民數十
人通商大臣崇厚議嚴懲之民不服國藩方病目詔速赴津乃務持平保和局
殺十七人又遣戍府縣吏國藩之初至也津民謂必反崇厚所爲備兵以抗法
然當是時海內初定湘軍已散遣天津咫尺京畿民教相聞此小事不足啟兵

端而津民爭怨之平生故舊持高論者日移書譴讓省館至毀所署楹帖而國藩深維中外兵勢強弱和戰利害惟自引咎不一辯也丁日昌因上奏曰自古局外議論不諒局中艱苦一唱百和亦足以焚上聽撓大計卒之事勢決裂國家受無窮之累而局外不與其禍反得力持清議之名臣實痛之國藩既負重謗疾益劇乃召鴻章治其獄逾月事定如初議會兩江缺出遂調補江南而以鴻章督直隸江南人聞其至焚香以迎以亂後經籍就燬設官書局印行校刊皆精審禮聘名儒爲書院山長其幕府亦極一時之選江南文化遂比隆盛時國藩爲人威重美鬚髯目三角有稜每對客注視移時不語見者竦然退則記其優劣無或爽者天性好文治之終身不厭有家法而不囿於一師其論學兼綜漢宋以謂先王治世之道經緯萬端一貫之以禮惜秦蔥田五禮通考闕食貨乃輯補鹽課海運錢法河堤爲六卷又慨古禮殘闕無軍禮軍禮要自有專篇如戚敬元所紀者論者謂國藩所訂營制管規其於軍禮庶幾近之晚年頗以清靜化民俸入悉以養士老儒宿學羣歸依之尤知人善任使所成就薦拔

者不可勝數一見輒品目其材悉當時舉先世耕讀之訓教戒其家遇將卒俸吏若子弟然故雖嚴憚之而樂爲之用居江南久功德最盛同治十三年薨于位年六十二百姓巷哭繪像祀之事聞震悼輟朝三日贈太傅諡文正祀京師昭忠賢良祠各省建立專祠子紀澤襲爵官至侍郎自有傳紀鴻賜舉人精算見疇人傳

論曰國藩事功本於學問善以禮運公誠之心尤足格衆其治軍行政務求蹈實凡規畫天下事久無不驗世皆稱之至謂漢之諸葛亮唐之裴度明之王守仁殆無以過何其盛歟國藩又嘗取古今聖哲三十三人畫象贊記以爲師資其平志學大端具見於此至功成名立汲汲以薦舉人才爲己任疆臣閫帥幾徧海內以人事君皆能不負所知嗚呼中興以來一人而已

清史稿

列傳一百九十三

駱秉章

胡林翼

駱秉章原名俊以字行改字顓門廣東花縣人道光十二年進士選庶吉士授編修遷御史稽察銀庫卻陋規嚴檢閱吏不便其所爲欲齟齬去之會發其奸不得逞歷給事中鴻臚寺少卿奉天府丞兼學政二十三年銀庫虧帑事發坐失察褫職罰分賠及愆定宣宗知秉章獨持正無私特旨以庶子用尋丁母憂服闋補右庶子先後命赴山東河南江蘇按事詞臣奉使出異數所治獄悉稱旨二十八年擢侍講學士出爲湖北按察使遷貴州布政使調雲南三十年擢湖南巡撫咸豐元年廣西匪熾詔湖廣總督程峴采赴湖南督辦防務秉章及提督余萬清副之大學士養尙阿督師過境以供張蕩有嫌密奏湖南吏治廢弛二年詔秉章開缺來京而粵匪已由桂林北竄入湖南峴采聞警由衡州退長沙尋復往駐萬清守道州被賊陷江華嘉禾桂陽郴州攸縣相繼失萬清逮治秉章坐未能預防革職留任先議修長沙城南畢工而賊由醴陵突犯長沙

秉章嬰城固守悍賊蕭朝貴預誦城壞故以輕軍來襲未得逞尋斃於礮副將鄧紹良赴援最先至入城任戰守賊屢以地雷壞城皆擊卻之新授巡撫張亮基至秉章奉旨暫留同守城及賊首洪秀全大舉來攻援軍向榮和春張國樑等亦並集且守且戰歷八十餘日賊引去陷岳州趨湖北襄尙阿程喬采並坐失機罷譴秉章以守城功免議召來京尋命留湖北襄辦防守事宜未至而武昌陷三年春官軍收復武昌暫署湖北巡撫詔赴徐州築糧臺未行復署湖南巡撫尋實授在籍侍郎曾國藩奉命治團練始立湘軍秉章力贊成之又延湘陰舉人左宗棠襄理戎幕廣羅英俊之士練勇助勦軍威漸振先清境內遣軍分路破江西賊於桂陽破廣西賊於永明零陵江華破廣東賊於興寧又破江西賊於茶陵而常寧永興土匪皆平賊由湖北進陷岳州令王鑫曾國葆水陸截擊敗之岳州遂復令貴州道員胡林翼率黔勇追賊逼界口四年總督吳文鎔師潰黃州漢陽復陷曾國藩水師成進援湖北前敵失利岳州復陷賊犯靖港及樟樹鎮距長沙數十里並陷寧鄉湘潭秉章調撫標兵益塔齊布軍令偕

楊岳斌彭玉燮同援湘潭國藩親率水師戰靖港復失利布政使徐有壬按察使陶恩培請奏劾罷其軍秉章曰曾公謀國之忠不可以一時勝敗論也會次日塔齊布等大破賊於湘潭復其城靖港賊亦遁走長沙獲安賊繞西湖陷華容龍陽常德令胡林翼專剿此路塔齊布羅澤南進規岳州崇陽通城未幾各城皆復而武昌再陷國藩整軍東征餉械悉力資之無缺十月遂克武昌湘軍之名自此顯五年武昌三陷胡林翼署巡撫飛書告急秉章令鮑超率水師先赴彭玉燮募勇繼之起楊岳斌於家統其衆以固北路而南路廣東廣西羣賊擾境土匪紛起應之令田興恕禦東路王龔剿西路先清土匪克東安斬廣西賊首胡有祿餘賊復擾永明江華擊走之克桂陽永興茶陵郴州宜章斃廣東賊首何祿貴州苗犯晃州沅州麻陽並擊走之南路遂定當武昌陷後總督楊需奏飭胡林翼渡江上扼漢川以固荆襄秉章上疏爭之略曰楊需始終堅執防賊北竄然以見在形勢論之江西湖南尙稱完地若使湖北水陸兩軍移駐漢川長江千里盡委之賊其將置東南於不問乎未解者一也移駐漢川祇能

禦上竄襄陽之路其於荊州並無輕重若賊水陸並進荊州門戶其孰當之未解者二也水陸兩軍相爲依附胡林翼既駐漢川則水軍非退守監利即移泊岳州爲湖南門戶計尙未爲失然武漢門戶豈能度外置之乎未解者三也若謂賊衆兵單不思廣濟失利之初以總督萬餘之兵不能當千餘之賊乃退守黃州未一日卽退漢川由此而德安而隨州今又退至棗陽北竄者賊也引之北竄者誰歟未解者四也扼賊北竄必固荊襄欲保荆襄必守武漢一定之局漢陽未復不能繞至漢川况武漢均爲賊屯胡林翼縱至漢川以孤軍駐四面皆賊之地又能爲荆襄門戶計乎未解者五也需之專防北竄原出迎合上意疏入詔斥所詆需者過當然上意開悟未久能需以官文代之與胡林翼合規武漢秉章悉力資給林翼軍如所以助曾國藩者泊林翼與羅澤南破石達開於咸寧達開折入江西連陷瑞州臨江而吉安撫州建昌屬城多被擾國藩自上年九江之挫久留南昌孤軍難進展秉章至是銳意東援令江忠濟出通城以固岳州令劉長佑蕭啟江率軍分路入江西六年劉長佑等連克萍鄉萬載

進攻袁州江忠濟戰歿通城以王龔代之連克通城崇陽蒲圻通山諸縣至冬長佑克袁州分宜新喻趙煥聯自茶陵收永寧余星元自酃縣收永新蓮花廳初議規江西分三路北路出瑞州中路出袁州南路出吉安劉長佑袁州一路兵逾九千餉難再籌至是始令周鳳山曾國荃各募勇二千合趨吉安詔嘉乘章不分畛域越境殄寇賜花翎七年武漢既復下游無警湘軍乃四出以蔣益澧率永州軍援廣西以王鑫軍增援江西以兆琛等軍援貴州需餉益鉅湖南自軍興停漕運米賤而徵折猶沿舊價民困賦絀乘章減浮折覈中飽民減納而賦增倣揚州例抽收鹽貨釐金歲入百數十萬給軍無缺王鑫戰江西屢破悍寇克樂安尋卒於軍以張運蘭及鑫弟開化分統其衆劉長佑攻臨江至十二月克之八年京察敘功加頭品頂戴劉長佑以疾歸以劉坤一代領其軍進規撫州建昌先後克復八月諸軍齊集克吉安石達開敗竄浙江江西略定乘章以兵合不易廳乘勝進取疏請起曾國藩督師援浙留蕭啟江張運蘭兩軍隨征餘軍盡撤蓋自五年援江西糜湖南餉凡二百六十萬協濟之數不預焉

石達開由浙入閩粵徘徊五嶺之上九年春復由江西入湖南秉章調魏喻義陳士杰扼歸河起劉長佑於家令與劉坤一募勇四萬備迎擊調蕭啟江張運蘭於江西調田興恕於貴州未集而賊至陷桂陽宜章興甯窺衡州爲歸河之軍所扼回竄嘉禾新田臨武甯遠達開大隊竄興永以據上游劉長佑出祁陽與之相持回犯東安新甯劉坤一再挫之乃趨寶慶衆號三十萬多烏合秉章下免死令散數萬人時趙煥聯田興恕等軍先至營城外賊營環二百里包諸軍於中胡林翼遣李續宜率軍赴援秉章令劉長佑劉嶽昭何紹彩分三路進六月戰寶慶城下內外夾擊賊人衆乏食再戰再敗遂東竄蕭啟江軍遇於永州又擊敗之乃由全州竄廣西啟江尾追劉長佑繼進敗之於大榕口又敗之桂林賊竄慶遠秉章令長佑留鎮廣西田興恕回貴州蕭啟江出沅江兼順川黔時廣東賊又擾邊境令張運蘭黃瀄熙分擊於江華宜章並殲之十年命赴四川督辦軍務時左宗棠已奉命募勇援浙聘湘鄉劉蓉督軍事湘軍名將多從曾國藩胡林翼惟劉嶽昭黃瀄熙在湖南調兩軍隨行受代將發石達開復

由廣東犯湖南境吏民乞留遣嶽昭瀆熙會剿賊尋引去十一年正月始啟行抵宜昌聞陳玉成犯湖北分遣嶽昭赴授自率五千人入川四川之亂始於咸豐九年滇匪藍大順又名朝柱李短搭又名永和結黨私販鴉片其黨被捕衆衆陷宜寶攻敘州極嘉定衆數十餘萬羣盜遂四起總督有鳳曾望顏等不能制徵兵湖南先遣蕭啟江一軍赴之啟江尋病歿詔曾國藩赴川督師中止未行成都將軍崇實署總督秉章奉命後慮客軍易遭齟齬猶觀望崇實馳書促行開誠迎候發夔關稅以給軍軍至乃出望外時賊首李永和卯得與蹇青神藍朝柱團絲州張第才何國樑圍順慶蹂躪四十餘縣將逼成都秉章至萬縣卽令黃瀆熙援順慶戰於定遠陣斬何國樑賊大敗追至潼川二郎場中伏瀆熙陣亡然賊驚湘軍勇銳引去秉章由順慶進駐潼川令胡中和蕭慶何必勝率蕭啟江舊部曾傳理代領黃瀆熙之衆劉德謙率親軍唐友耕率川軍合萬九千人援緜州別以他軍緜青神分扼東北會穆宗卽位擢授秉章四川總督八月師會緜州城下連破賊十餘壘賊敗退渡涪水屯守官軍作五浮橋以濟

又擊敗之賊遁走由什邡崇慶趨丹棱秉章始入成都莅任奏勅布政使祥奎中軍副將張定川不職罷之薦劉蓉詔超擢署布政使軍事吏治振刷一新於是分剿諸賊急攻藍李二股令唐友耕扼眉州洪堰斷青神之援胡中和等諸軍圍丹棱作長濠木城節節進逼賊棄城走追斃藍朝鼎於陣餘賊分路逃散爲民團汛兵截殺幾盡藍朝柱率二百人遁入山尋出合諸匪陷新寧復爲官軍擊散其後陝西盤屋匪潰走興安爲民團所獲有自稱爲藍大順及弟三順至九順並戮之李永和見丹棱已克亦遁走分軍追擊圍之於鐵山同治元年京察詔嘉秉章殄寇迅速整頓地方加太子少保尋克青神李永和卯得興由鐵山遁走追至宜賓禽之道員張由庚克新寧賊分竄張第才遁陝西曹燦章入老林總兵周達武解涪州圍追禽周紹湧於大竹又禽郭刀刀於巴州周駢駢由雲南入岳池合州新寧張由庚擊走之諸城皆復至冬川南北一律肅清詔調度有方子優敘石達開見川中兵事方殷屢由黔楚窺伺來犯是年春陀石柱撲涪州爲劉嶽陷軍所阻竄黔境尋又入敘永攻江安陷長寧分擾洪

高慶符劉嶽昭曾傳理等擊敗之退滇境分竄筠連高縣官軍扼金沙江以守賊謀三路入川秉章調諸將及土司兵分防二年正月賴裕新自甯遠犯冕寧至越嶲爲印部土司嶺承恩擊斃餘賊散擾川西十餘縣多爲官軍民團截殺盡殲於平武山谷中三月石達開渡金沙江爲唐友耕等軍所扼由小徑趨土司紫打地大渡河水漲官軍伺半濟擊之退撲松林小河又爲土司王應元所扼嶺承恩夜襲破馬鞍山賊營斷其糧道復連撲兩河皆不得渡糧盡殺馬採樹葉而食唐友耕等漢土官兵合擊焚其巢墮巖落水無數餘七八千人奔老鴉漩復爲土兵所阻達開率一子及其黨三人乞降解散四千人餘黨盡誅之五月檻送達開至成都磔於市捷聞詔深嘉之加太子太保將士獎擢有差李幅猷爲達開死黨初約由黔入川令劉嶽昭與黔軍合剿尋於黔境就殲達開餘孽遂盡粵匪擾陝西圍漢中秉章令道員易佩紳率軍解其圍張由庚駐防川境至是復令蕭慶高何必勝赴剿詔擢劉蓉爲陝西巡撫督諸軍秉章病目請告命力疾視事三年江甯克復詔錄前後功予一等輕車都尉世職賜雙眼

花翎四年陝西粵匪爲諸軍擊敗竄甘肅階州令周達武會剿平之回剿南坪番匪匪首歐利哇降又剿馬邊禽匪首宋士傑邊境悉平令劉嶽昭撥黔由綏陽抵遵義道路始通後由黔規滇皆秉章遺策也六年夏疾愈視事命以四川總督協辦大學士十一月卒於官優詔賜卹稱其公忠誠亮清正勤明贈太子太傅入祀賢良祠四川湖南建專祠賜其子天保郎中天詔舉人諸孫並賜官設文忠秉章晚年愈負重望朝廷要政多諮詢西南軍事胥倚之所論薦人才悉被任用著勳名川民感其削平寇亂出於水火及其歿巷哭罷市遺愛之深世與漢諸葛亮唐章皋並稱云

胡林翼字潤之湖南益陽人父達源嘉慶二十四年一甲三名進士官至少詹事學宗宋儒林翼少時即授以性理諸書而林翼負才不羈娶總督陶澍女習聞緒論有經世志道光十六年成進士選庶吉士授編修二十年充江南副考官坐失察正考官文慶擢舉人熊少牧入闈降一級調用丁父憂服闋捐納內閣中書改貴州知府署安順鎮遠皆盜藪用明威紀光法練勇士搜捕林箐身

與同甘苦屢禽劇盜靖苗氛以功賜花翎又因防剿新寧匪李沅發以道員用
總督吳文鎔巡撫喬用遷並薦堪大用咸豐元年補黎平實行保甲團練千五
百餘寨建礮樓四百餘座嚴扼要隘儲穀備城守地鄰湘桂匪輯而民安三年
勦魏安榔匪誅其魁湖南巡撫張亮基駱秉章兩次奏調以貴州留不行御史
王發桂疏薦林翼剿匪成效詔赴湖北委用四年擢貴東道率黔勇千人行次
通城而總督吳文鎔戰歿黃州遂進援武昌賊尋犯湖南駱秉章調林翼回防
平安化土匪擄四川按察使尋調湖北曾國藩既克武昌檄林翼與羅澤南會
攻九江屯湖口破賊梅家洲五年春擢湖北布政使總督楊滂師潰黃梅林翼
率所部回援武昌別以副將王國才一軍隸之未至漢陽陷會攻不克屯沌口
武昌復陷潛師渡江規武昌爲賊所圍兵少食盡退金口詔林翼署理湖北巡
撫楊滂奏令上扼漢川林翼疏陳形勢宜急攻武漢方能內固荆襄上俞之時
武漢黃德四郡皆爲賊踞後路崇陽通城多伏莽公私赤立兵餉皆絀林翼馳
書四出乞貸發家穀給軍添募兵勇兼顧南北兩路凡數十戰時有克捷亦屢

瀕於危七月攻克漢口鎮奪大別山賊卡未幾援賊由漢川至焚漢口崇通匪
句結武昌城賊撲金口大營詔念林翼素善用兵勉以重整散卒尋退彭山餉
絕兵潰下部議處林翼移營大軍山收集潰兵駐新隄嘉魚水陸合萬人牛出
新募賊至常數萬軍中奪氣林翼鎮靜相持以忠義激厲將士始漸定奏調羅
澤南由江西來援連克通城崇陽林翼自往迎之於蒲圻合破援賊韋俊石達
開於咸甯復其城乘勝進攻武昌自率所部普承堯唐訓方軍由中路羅澤南
當西路楊岳斌以水師會金口總督官文亦令都興阿率騎兵駐北岸林翼和
輯諸將軍勢遂日振屢戰皆捷六年三月羅澤南急攻城傷於礮驍卒以李續
賓代領其軍攻戰不少輟石達開自咸甯敗後竄江西連陷數郡曾國藩屢調
羅澤南回援不克往林翼分遣劉騰鴻普承堯兩軍赴之詔以武漢久不克督
戰急林翼疏陳略曰臣頓兵城下五月餘矣血肉之軀日當礮石傷亡水陸士
卒三千餘喪將領羅澤南周得魁百餘人李續賓中丸墮馬者數矣夫兵易募
而將難求臣觀前史李左車告韓信以頓兵城下情見事拙爲戒戰易攻難自

昔已然故臣自四月後乃禁仰攻分兵咸蒲以取義寧四戰皆捷分水師以清
下游直達九江臣自率兵五千扼武昌南路李續賓率六千三百扼洪山東分
勦北路水師六營下駐沙口賊由九江興國分路來援臣豫撥三千餘人戰於
百里之外徵臣之志誓與兵事相終始萬一變生意外決不敢退怯苟且自取
羞辱文宗覽奏特慰勉之五月賊於武昌城外豹子澗等處增壘掘濠林翼抽
調諸軍擊之遂於要隘掘濠困賊賊屢撲皆擊退諜知九江賊古隆賢來援已
至樊口先遣黨數千進踞葛店令蔣益澧率精銳迎擊戰於葛店大破賊焚其
舟追至樊口楊載福水師亦至合擊斃賊數千攻克武昌縣城遂渡江攻黃州
而石達開由江西竄江甯復糾衆上犯分數路七月急調黃州軍回援賊由金
牛趨葛店古隆賢亦起應之林翼督水陸軍分禦連戰於油坊嶺魯家港姚家
嶺嶺灣沙子嶺小龜山旬日內二十餘捷禽斬無算解散脅從萬餘追奔百餘
里至華容賊悉遁九月楊岳斌追賊至蘄州焚其舟直抵田家鎮賊援既絕添
募陸勇五千水師六營爲長圍計十一月咨會官文冠期大舉楊岳斌斷攔江

鐵鎖焚賊船盡賊傾城出撲鏖戰三時大敗狂奔諸軍逐之遂復武昌禽賊酋
古文新等駢誅數百人生降四千同日官文亦克漢陽詔實授林翼湖北巡撫
加頭品頂戴遂分兵收復武昌縣黃州府及興國大冶蘄水蘄州黃梅令李續
寶乘勝規九江都興阿楊岳斌鮑超屯小池口自駐武昌籌全局上疏論軍事
吏治略曰湖北軍務不飭已久無論賊之多寡強弱聞警先驚接仗即潰上下
相蒙恬不知恥誤於使貪使詐而實爲貪詐所使川楚河南勇目招合無賴投
効以一報十冒領口糧交綏即敗又顧之他帑項至艱徒飽無賴慾壑遣散不
得其方又相聚爲盜近年湖北募勇之大患緣管則怯懦若性正額虛浮軍政
營制蕩然無存此爲兵事急應整頓之要自古用武之地荆襄爲南北關鍵武
漢爲荆襄咽喉武漢有警則鄰壘胥震四年之中武昌三陷漢陽四陷東南數
省受害惟武漢爲甚夫善鬪者必扼其吭善兵者必審其勢今於武漢設重鎮
則水陸東征之師恃爲根本軍火米糧委輸不絕傷痍疾病休養得所平吳之
策必先保鄂明矣保鄂必先固漢陽湖北之失在漢陽無備下游小挫賊遂長

驅直入應請於武漢設陸師八千水師二千日夜訓練平時有藜藿不採之威
臨事有千里折衝之勢且東征之師孤軍下剿苦戰必傷久役必疲傷病之人
留於軍中不但厭戰亦且誤餉若以武漢之防兵更番迭代則士氣常新軍行
必利此武漢宜急設防練之要湖北秀民從賊者多兵勇搜捕徒滋擾害惟有
保甲清釐族戶細獻分別斬釋然牧令不得其人則法不能行官吏之舉動爲
士民所趨向紳士之舉動又爲愚民所趨向未有不養士而能致民不察吏而
能安民者五年大熟州縣乃或報災六年大饑州縣轉或徵賦以豐爲歉是病
國計以歉爲豐是害民生而終害於國計歉歲官吏私收蠲緩實惠不及於民
有所謂挖微急公等名目無一非蝨國病民凡下與上交接之事諉之幕友官
與民交接之事諉之門丁詞訟案牘病在積壓盜賊姦究弊在因循州縣之小
事即百姓之大事今日之小賊卽異日之大賊厝火積薪隱憂方大又如捐輸
則有踩堂費見之費牙帖則有勒索之費釐金則有私設之費臣受事以來迭
次特參在國自有刑章在臣甘爲怨府惟思勦貪非難求才爲難前者勦去後

者踵事而巧避其名弊將不可勝言臣愚以爲必嚴禁官場應酬陋習與羣吏更始崇尚敦樸屏退浮華行之數年庶可改觀目下州縣懸缺待人請敕下部臣暫勿拘臣文法資格此吏治急應整飭之要武漢甬督收復人或以爲已治已安臣竊憂之如以爲治安則前收復已二次矣况江西七府俱淪於賊旁軼橫出不僅九江安慶爲足慮也未收復之前事勢極難文武尙有懼心收復之後布置尙易而特恐文武均萌肆志外省粉飾之習久在聖明洞鑒不揣愚昧用以直陳疏入上嘉納焉於是裁浮勇練新軍獨四十六州縣田賦以蘇民困設清查局稽核全省倉庫盈虛之數設節義局表彰死難官紳士女設軍需局以備東征餉械嚴課吏治糾劾文武數十人推廉尙能手書戒勉將吏如子弟初將吏頗構督撫異同下令曰政再言北岸兵事吏事長短者以造言論罪官文亦開誠相與無掣肘軍政吏治皆林翼主稿林翼推美任過督撫大和湖北振興實基於此襄陽土匪猖獗擾及河南境令唐訓方等勦之七年春禽匪首高先二等陳玉成由皖北上犯諸軍不能禦林翼赴黃州督師賊衆十餘萬環

踞巴河東會水漲林翼令毀三台河石橋扼河而守潛師出迴龍山遏賊上竄
調李續宜率湖勇馳至督諸軍合擊於孫家嘴馬家河月山賊大敗遁走都興
阿李續寶亦連破賊於黃梅宿松楚北肅清遂視師九江定合圍方略而還八
年四月李續寶等攻九江克之磔賊首林啟榮詔嘉林翼調度有方加太子少
保林翼乃急規安慶楊岳斌率水師出九江都興阿出宿松望江逼安慶爲圍
師李續寶規復太湖潛山桐城與都軍爲犄角五月丁母憂詔予假百日治喪
假滿仍署巡撫七月廬州陷李續寶輕軍赴援戰歿三河林翼方奉母柩回籍
詔急起視師林翼聞命病哭起行逕次黃州軍心始定九年進屯上巴河與李
續宜整飭部伍日夜訓練謀大舉會石達開由江西犯湖南圍寶慶林翼令李
續宜率所部赴援舒保馬隊助之又以水師分扼河道寶慶圍得解於是與曾
國藩合力圖復安徽國藩循江而下爲第一路多隆阿鮑超攻取潛山太湖爲
第二路林翼自出英山霍山爲第三路李續宜由松子關山商城固始爲第四
路十月由黃州移營英山陳玉成在賊中最狡悍見太湖圍急糾合捻匪張洛

行襲瞎子寨數十萬來援林翼集諸軍精銳全力備戰欲一鼓殲之與曾國藩部署諸將指揮戰略謀前敵總統以多隆阿謀勇兼優而鮑超素不相下手書勸勉十數往復始定議又備意外令金國琛余際昌以八千人出潛山天堂拊賊背十二月賊至鮑超營小池驛當其衝賊衆攻之多隆阿慮分兵掣全勢置不救調唐訓方往助事且急金國琛等由山中鼓行而出賊乃奪氣十年正月多隆阿攻羅山衝爲西路鮑超出小池驛爲東路朱品隆將凝學唐訓方等合擊金國琛等亦同時並進大破賊殲斃先後二萬餘遂克太湖城潛山亦復是役爲僅見之大捷安慶之勢遂孤既而江南大軍潰蘇常盡陷曾國藩授兩江總督督師林翼爲畫分路大舉之策國藩不盡用率鮑超等次祁門爲規復江南計以其弟國荃圍安慶林翼令多隆阿圍桐城李續宜屯青草塢爲兩軍援都興阿別出師江北分兵濟餉林翼悉任之十月多隆阿李續宜大破賊於桐城挂车河林翼進駐太湖度賊援安慶不利必深入湖北腹地以分我軍勢令余際昌屯霍山樂兒嶺成大吉屯羅田松子關戒賊至勿浪戰堅守待援十一

年春賊果合捻匪西犯成大吉破之松子關屢挫渠與瞎子霍山守者違節度爲賊所敗遂進陷黃州德安孝感隨州林翼令李續宜回援賊復分股回略斬黃趨安慶約城賊夾擊檄成大吉下援鮑超亦山南岸至破賊於集賢關禽斬數千磔其渠劉瑄林多隆阿亦破援賊於桐城賊計不得逞城中糧將盡勢益蹙南岸之賊復由江西犯興國大冶南及崇通武漢震動林翼方病咯血自率師回援而圍攻安慶益急及抵湖北賊已聞風遁八月朔遂克安慶曾國藩推林翼爲首功詔加太子太保予騎都尉世職桐城廬江舒城以次復黃州德安之賊先後禽斬楚境悉平林翼久病聞文宗崩於熱河行在大慟嘔血八月卒詔贈總督祀賢良祠湖北湖南並建專祠賜其子子助舉人設文忠同治元年復詔林翼未竟全功遽就渣逝蹟其功助卓越名播寰區至今江鄂士民稱頌命於原籍家祠賜祭一壇泊江南平加予一等輕車都尉世職子子助襲後併兩世職爲男爵光緒中以孫祖蔭襲官郵傳部參議林翼貌英偉目巖巖威棱攝人事至立斷無留難尤長綜覈釐正湖北漕糧積弊以部定漕折爲率因地

量加輕重民歲減錢百餘萬緡歲增帑四十餘萬兩提存節省銀亦三十餘萬兩兩湖自准鹽阻絕率食川鹽於宜昌沙市武穴老河口設局徵稅視舊課增至倍徙時東南各省皆抽釐助餉惟湖北多用士人司權覈實無弊其治軍務明紀律手訂營制留意將才嘗曰兵之器者無不能將之貪者無不法觀將知兵觀兵知將爲統將必明大體知進退緩急機宜其次知陣法臨敵決勝又其次勇敢此大小之分也馭將以誠因材而造就之多以功名顯察吏嚴而不沒一善手書褒美受者榮於薦剡故文武皆樂爲之用士有志節才名不樂仕進者千里招致於武昌立寶善堂居之以示坊表嘗曰國之需才猶魚之需水鳥之需怀人之需氣草木之需土得之則生不得則死才者無求於天下天下當自求之薦舉不盡相識無一失人曾國藩稱其薦賢滿天下非虛語嘗自以聞道晚刻自繩檢欲然常若不足家有田數百畝初筮仕誓先墓不以官俸自益父著弟子箴言行世承其志爲箴言書院教人務實學病革曰吾死諸君購吾惟修書院無贖吾家所著讀史兵略奏議書牘皆經世精言

論曰駱秉章休休有容取人爲善胡林翼綜覈名實幹濟冠時論其治事之寬嚴疏密若不相侔而皆以長駕遠馭驅策羣材用能不樹偉績所莅者千里方圻規畫動關軍事全局使無其人則曾國藩左宗棠諸人失所匡扶憑藉其成功且較難緬懷中興之業二人所關繫者豈不鉅哉

清史稿

列傳一百九十四

江思源

羅澤南

江思源字岷樵湖南新甯人道光十七年舉人究心經世之學抗爽尚義公車入京初謁曾國藩國藩曰吾生平未見如此人當立名天下然終以節烈死大挑敘職回籍察教匪亂將作陰以兵法部勒鄉里子弟既而黃背崗盜雷再浩果勾結廣西莠民爲亂一戰破其巢禽再浩戮之以功擢知縣揀發浙江秀水災奉檄往賑遂權縣事賑務畢舉禽劇盜十數邑大治巡撫吳文鎔待以國士補麗水檄治海塘文宗即位曾國藩應詔薦其才送部引見尋以父憂去官咸豐元年大學士賽尚阿督師勦粵匪調赴軍前副都統烏蘭泰深倚重事必諮而行思源招舊所練鄉兵五百人使弟忠溶率以往號楚勇賊氛方熾官兵莫禦其鋒思源勇始至偏賊而壘賊輕其少且新集急犯之堅壁不出逼近始馳突斬級數百一軍皆驚累功賜花翎擢同知直隸州賊聚永安向榮與烏蘭泰不協思源調和勿聽知必敗引疾回籍二年春賊果突圍出犯桂林思源聞警

增募千人借劉長佑兼程赴援未至烏蘭泰傷歿於軍自是獨領一軍進扼桂林城外鷓鴣洲三戰皆捷圍尋解擢知府賊竄全州將趨湖南忠源借諸軍進擊賊陷城不守復出竄悉載輜重舟中期水陸並下忠源發樹塞河截賊資衣渡慶戰兩晝夜俾曾馮雲山中礮死賊棄舟夜遁盡獲其輜重忠源先請扼東岸未用其策賊由東竄入湖南陷道州又讓賊衆不滿萬慮日久裹脅衆分防不如合勦遠堵不如近攻於是諸軍合攻道州賊堅壁意在久踞購城中內應約期襲之賊走藍山嘉禾犯桂陽陷郴州忠源謂後路進勦愈前路攻陷愈多請仍申合勦之議當事不省賊益張徑犯長沙忠源借總兵和春馳援至則賊已踞城南窟穴民屢攻城甚急忠源望見天心閣地勢高賊懼其上驚曰賊據此長沙危矣率死士爭之賊敗退趨移壘逼賊共汲一井擊柝相聞忠源弟忠濟自郴州尾賊至約夾擊爲伏賊所傷縋入城商方略因語衆曰官軍四面集惟河西一路空虛賊奪民舟渡江掠食盡將他竄宜重兵扼迥龍塘巡撫張亮基躡之而諸將逡巡莫前時賽尙阿能徐廣縉代之未至城內外巡撫三

提督二總兵十莫相統攝忠源赴湘潭請於廣縉不省賊卒由迴龍塘竄陷岳州遂破武昌忠源痛謀不見用不欲東張亮基奏留守湖南勦平巴陵土匪調赴瀏陽勦徵義堂會匪周國虞斬馘七百解散萬人瀏陽平擡道員三年正月授湖北按察使張亮基署總督兵事悉倚之勦平通城崇陽嘉魚蒲圻諸匪禽其渠劉立簡陳百斗熊開宇等文宗知忠源忠勇可恃命率所部赴向榮軍尋命幫辦江南軍務瀕行上疏切論軍事略曰粵寇之亂用兵數年糜餉二千萬人無固志地罕堅城臣出入鋒鏑於今三年詭策其大端惟聖明裁察一曰嚴軍法將不行法是謂無將兵不用法是爲無兵全州以失援陷而左次相仍道州以棄城陷而潰逃踵接岳州設防而不能爲旦夕之守九江列艦而不能遏水陸之衝豈有他哉畏賊之念中之也賊嘗致死於我而我不能致死於賊賊之戰也驅新附於前以故黨乘其後卻則擊殺故賊退必死而進乃生我退必生而進則死不待戰陣而勝負分焉已誠欲反怯爲強莫若易寬爲猛皇上執法以馭將帥將帥執法以馭偏裨偏裨執法以馭兵士避寇者誅不援者誅未

令而退者誅法令既嚴軍聲自壯此討賊之大端也一日撤提鎮承平既久宿將凋亡提鎮大臣積資可待位尊則意爲趨避偏裨不敢與爭權重則法難驟加督撫不能擅決人情當齒壯官卑之日輒思發奮爲雄位高則進取念衰必不能踔厲以赴時會且軍興數載饋餉滋艱提鎮所需較副參懸絕裁一提鎮養精兵二百而有餘奚取以有限脂膏奉此無益之提鎮誠擇一深明將略者統制其間餘則悉歸休致副將以下量擢其才此整軍之要道也一日汰冗兵選兵膽氣爲上堅樸次之技藝又次之質實耐苦之人令進則進令退則退其身聽命於將而不知它浮怯之徒無事則趨踰觀美臨陣則退縮旁徨論功則鑽刺以圖美官遇敗則推諉以逃咎反宜汰者一也征調頻煩或願老備籍坐耗資糧或部曲散亡驚魂甫定當此餉精匱絀豈容更益虛糜宜汰者二也誠敕各營將領討部曲而嚴察之氣充膽壯者備攻勦樸實堅苦者備屯防舍此二端盡歸釐汰此致強之急務也一日明賞罰勝有賞敗有罰亘古不變之常經也願勝有賞而賞非勝則不如無賞敗有罰而罰非敗則不如無罰無賞無

罰人猶冀賞罰之時實非其功罰非其罪則懲勸之用乖怨讒之聲作而軍事不可爲矣今戰勝有功固當賞錄左右侍從獎敘尤多且未嘗行一失律之誅按一縱寇之罪勝敗本兵家之常主兵者每言勝而諱敗功過本無妨互見主兵者輒匿過而言功治承平天下且不可況危亂之世哉夫軍中賞罰未可一概論勝固當賞或旅進取斬級以冒功或追擊貪貨財而得小則當罰敗固當罰或過勇先驅後援不繼或大軍已卻一將獨前則當賞今大帥據營將之言營將恃左右之口功罪之實非探訪所可知好惡之心因毀譽而多舛求是非治乎人心難矣自非親歷行陣開誠布公何以慰軍士之心而振波靡之習此風氣不可不急爲振拔者也一日戒浪戰用兵之道能守而後能戰能制人而後不制於人能避賊之長而後可用吾之短臣自廣西以來深觀賊勢結營則因地築壘環以深濠置陣則正兵敵前奇兵旁襲止則徧購徒黨伺吾虛實行則遙壯聲威乘吾張皇故嘗以爲賊止則當扼要以斷其饋濟賊兵以截其奔逃賊行則當逆擊以遏其鋒設伏以撓其勢乃我之圍賊不嚴守而攻堅追賊

不載歸而尾擊小有挫失士氣先頽此兵法不可不變計者也一曰察地勢勢者非圖史所載山川一定之險也視賊出入之途先爲之防察賊分合之機遙爲之制則漸車之澮數仞之岡苟形勢在所必爭即事機不容或失全州葦衣渡之戰寇焰已摧宜速壁河東斷其右臂道州之役寇鋒已挫宜分屯七里橋扼其東趨長沙將解圍則宜堅壁迴龍潭土橋頭使賊不得西犯它若道州蓮花池蓮瀟灣死地六十里而縱之使生湘陰臨資口岳州城陵磯皆必爭之區而縱之使遁禍機在咫尺之間流毒遂在千里之外此敗轍之不可不深鑒者也一曰嚴約束殺賊所以安民安民乃可殺賊粵寇慘虐不可勝言然擇肥而噬窮簷不暇搜求或僞結民心多償市直兵則攫取姦汚窮戶且難倖免故於賊且有恕詞於兵能無怨毒且長夫估客游蕩無常託僞營裝恣行淫掠鄉民畏懼莫敢誰何應救諸營首嚴防制備冊時稽犯則軍法按行絕其芽孽此結民心愆後患之要圖也一曰寬脅從粵寇徒黨喪亡實多煨燼之餘類多附脅平昔曾徒盜賊寬典相蒙監禁軍流乘時放逸命爲前導尤所甘心凡此法無

可道自爾獲焉必殺至若良民驅迫骨肉羈縻此中進退維谷之忱艱苦顛連之狀每一念及輒用隱傷宜敕各營刊示射達臨陣建免死之旗令其倒戈以赴曲賜保全既可探賊情復以携賊黨此尤好生盛德討賊機宜之大權也行此八者破格以攬奇才便宜以畀賢帥擇良吏以固根本嚴綜覈以裕餉源如此而盜賊不滅盛治不興願斬臣首以謝天下疏入上嘉納之行至九江聞南昌被圍方有旨促援鳳陽疏請先援江西率兵千三百人三晝夜馳抵南昌巡撫張芾舉王命旗牌授忠源戰守事悉聽指揮忠源火城外廬廬斬逃者謂章江門最受敵自當之日登城督戰賊穴地轟城崩數十丈刃斃先登賊囊土填缺數突門出戰夜遣死士縋下焚賊營詔嘉獎被珍賚尋湖南援師至分軍扼樟樹鎮遣羅澤南剿平泰和萬安安福土匪守南昌九十餘日至八月屢破賊賊壘沈賊船乘風縱火賊乃遁詔嘉其功加二品頂戴賊退據九江分擾湖北興國巡犯田家鎮忠源赴援部兵二千途阻不能遽達先挈親兵數十人抵田家鎮甫一日賊舟乘風大至道員徐豐玉等死之忠源自劾詔原之降四級留

任尋擢安徽巡撫賊已陷黃州漢陽圍武昌沿江擊賊敗之武昌解嚴疏請增兵萬人當淮南一路而湖北留其兵不盡遣僅率兵二千冒雨行將士疲頓忠源亦遘疾至六安賊已陷桐城舒城吏民遮留不可留千人守六安昇疾抵廬州部署未定賊已大至城中合援兵團勇僅三千人忠源力疾守陴迭挫撲城之賊地道轟城屢圯皆奮擊却之詔嘉忠源力保危城躬馳戰陣賜號霍隆武巴圖魯時陝甘總督舒興阿兵萬餘畏葸不進忠源弟忠濬偕劉長佑來援駐城外五里墩阻不得前被圍月餘廬州知府胡元煒陰通賊賊知城中食乏軍火將盡攻益急水西門圯且戰且修築賊突自南門緣梯入忠源掣刀自刎左右持之一僕負之行忠源奮脫轉戰至水閘橋身受七創投古塘死之布政使劉裕鈺池州知府陳源堯同知鄒漢勳胡子雖縣丞興福艾延輝副將松安參將馬良戴文淵同時殉難胡元煒竟降賊忠濬募人求其屍後八日部卒周昌迹得之負出面如生事聞文宗震悼贈總督子騎都尉兼雲騎尉世職入祀昭忠祠諡忠烈同治初江南平追念前功予三等輕車都尉世職湖南江西並建

專祠湖北省城與羅澤南合祀三忠祠忠源歿逾年湖南有寇警弟忠淑奉檄募勇助勦母陳出私財助餉並懸重賞以勸衆事定巡撫駱秉章以聞特旨予忠源父母三代一品封典忠源弟三人忠濬忠濟忠淑族弟忠義忠信皆自忠源初起即從軍中忠濬忠義自有傳忠濟從守長沙城懷堵缺口殺登城賊數十以勇名三年忠源赴湖北以舊部千人付忠濟留長沙忠源勦賊通城兵單不利忠濟倍道赴援戰於桂口斬賊首陳申子於陣又破何田俊等焚其巢及援南昌兩塞城缺斬賊之先登者巡撫張芾疏稱其精敏勇敢軍中畏服累功擢候選知府江西解嚴後忠濟回籍侍母忠源既歿有旨仍用忠濟及忠濬率兵剿賊忠濬方赴援廬州從和春攻勦忠濟爲駱秉章調赴藍山甯遠勦土匪連破賊解圍擢道員五年駐防岳州胡林翼攻武昌未下賊勾結崇陽通城土匪忠濟遣兵復通城遂留駐六年春江西賊由義甯竄至忠濟進擊連破賊壘而悍黨集數萬爲所圍力戰三日營陷死之贈按察使銜子騎都尉世職諡壯節忠信少斲弛不職年十六從忠源赴廣西軍犯軍令忠源將斬之衆爲乞免

及遇賊驍捷敢戰常爲軍鋒累加擢千總聞忠源被圍廬州從忠源赴援比至壁西門外五里墩不得進忠信夜率壯士十餘人潛越賊營縋入城告以援至留城中屢完城缺縋出攻賊壘殺賊擢守備賜花翎及城陷忠源揮之去五年從忠濬復廬州功多擢游擊賜號毅勇巴圖魯忠濬假歸代統其衆六年從和春克三河巢縣累擢副將從秦定三規桐城建議出奇兵夾擊連破賊營十有六進逼城下賊大出迎擊進至東門外躍馬越濠禽賊將礮丸中左腋隕於陣予雲騎尉世職設忠節忠濟忠信並附祀忠源專祠

羅澤南字仲嶽湖南湘鄉人諸生講學鄉里從游甚衆咸豐元年舉孝廉方正二年粵匪犯長沙澤南在籍倡辦團練三年以勞敘訓導曾國藩奉命督鄉兵檄勦平桂東土匪擢知縣江忠源援江西乞師於國藩乃令澤南率以往所部多起書生初臨行陣戰南昌城下爭奮搏死者數人國藩聞之喜曰湘軍果可用及圍解勦安福土匪以三百人破賊數千擢同知直隸州歸湖南勦平永興土匪所部增至千人屯衡州與國藩簡軍實更營制教練歷半載四年六月偕

塔齊布進攻岳州以大橋爲賊所必爭堅扼不動伺便突出擊之三戰皆捷殲賊千閏七月破高橋賊壘九賊退踞城陵磯借塔齊布乘勝進擊連破賊營賊遂遁走擢知府賜花翎自是湘軍名始播以澤南與塔齊布並稱轉戰而東復崇陽擊走咸甯賊再敗之金牛進駐紫坊曾國藩會諸將於金口議攻武昌澤南繪圖獻方略謂由紫坊出武昌有二道請以塔齊布扼洪山而自攻花園賊萬餘踞花園築堅壘一枕大江一瀕青林湖一跨長隄深溝重柵峙江東岸與蝦蟆磯對壘列巨礮向江內外分阻水陸兩路澤南率隊直趨花園賊懸木城發礮士卒蛇行而進三伏三起已逼賊壘分兵奪賊舟舟賊退營賊亦亂三壘同下朔日又破鮎魚套賊營其竄洪山者爲塔齊布所扼賊夜棄城走武昌漢陽皆復距會議僅七日捷聞以道員記名尋授浙江甯紹台道國藩請仍留軍賊據興國分陷大冶澤南馳克興國塔齊布亦克武昌大冶乃規取田家鎮賊以鐵鎖截水師而踞半壁山爲犄角夾江而守澤南進駐馬嶺坳距半壁山三里許賊數千突來犯而由田鎮渡江來援者近萬人澤南兵僅二千令堅伏度

賊懈奮擊賊大潰後路爲我軍所阻墜崖死者數千遂奪牛壁山水師斷橫江鐵鎖燔賊舟克田家鎮賜號普鏗額巴圖魯加按察使銜時議水陸軍分三路進勦總督楊需督江北岸軍澤南偕塔齊布攻其南曾國藩督水師循江下甯不能軍賊復北趨乃偕塔齊布改北渡江復廣濟黃梅賊退踞孔隴驛小池口澤南約諸軍會攻渡江未半賊來犯軍少卻澤南傷臂仍指揮衝突分兵破街口賊壘賊曾羅大綱引去是役也五千人破賊二萬賊乃盡撤沿江諸營併守九江塔齊布圍攻之澤南別剿盩厔山遇湖口援賊會水師入鄱陽湖爲賊所襲輜重皆失國藩馳入澤南營而水師阻湖口不得出五年湖北官軍屢敗武昌復陷澤南從國藩入南昌赴援饒州戰於陳家山大松林大破賊復弋陽又援廣信破賊於城西烏石山復之連復興安德興浮梁進剿義甯敗賊於梁口繼嶺復義甯加布政使銜澤南見江西軍事不得要領上書國藩略曰九江逼近江南兼牽制武昌故賊以全力爭之犯弋陽援廣信從信水下彭蠡抄我師之右據義甯守梅嶺從修水下彭蠡抄我師之左今兩處平定九江門戶漸固惟

湖北通城等處羣盜如毛江西之義甯武甯湖南之平江巴陵終無安枕之日
欲制九江之命宜從武昌而下如解武昌之圍宜從崇通而入爲今之計當以
湖口水師九江陸師截賊船之上下更選勁旅掃崇通以進武昌由武昌以規
九江東南全局庶有轉機國藩據以上聞遂命澤南移師湖北會剿以塔齊布
舊將彭三元普承堯所部寶勇隸之凡五千人九月至通城賊號數萬皆烏合
一戰而潰進奪桂口要隘克崇陽駐軍羊樓崗悍賊章俊石達開合黨二萬餘
自蒲圻來犯截擊走之胡林翼來勞師合攻蒲圻復其城乘霧進克咸甯自是
武昌以南無賊蹤十一月師抵紫坊與林翼議進取次第澤南屯洪山林翼屯
城南隄上水師駐金口賊於城外築堅壘十三與城埒初戰賊二萬出十字街
林翼與交綏數卻數進澤南與李續賓分兩路潛抄賊壘破十字街營盡毀城
東南諸壘八步街口爲我軍通江要路塘角爲賊糧運所出先後攻破之焚其
船廠環西北賊壘亦盡賊又由望山門外葺石壘二揮軍塌平之又迭於窯灣
塘角逐賊殲數千賊遂閉城不出石達開自崇陽敗後竄入江西勢復張曾

國藩檄澤南回援澤南以武漢爲南北樞紐若湘勇驟撤胡林翼一軍不能獨立見在賊糧將盡功在垂成舍之非計其父年八十貽書軍中勗以忠義林翼以聞六年二月詔特予澤南祖父母父母二品封典以示旌異三月賊開門出撲澤南親督戰援賊大隊繼至我軍自洪山馳下奮擊追逐直抵城下飛礮中澤南左額血流被而駐馬一時許歸洪山猶危坐營外指畫戰狀朔日卒於軍文宗震悼詔依巡撫例議卹賜其父嘉旦頭品頂戴子兆作兆升皆舉人子駒都尉世職入祀昭忠祠本籍湖北江西建立專祠設忠節及江南平穆宗追念前勞加一雲騎尉世職澤南所著有小學韻語西銘講義周易附說人極衍義姚江學辨方輿要覽諸書體用兼備一宗程朱學者稱羅山先生嘗論兵略謂大學首章知止數語盡之左傳再衰三竭之言其注脚也弟子從軍多成名將最著者李續賓李續宜王鑫劉騰鴻蔣益澧皆自有傳其早死兵事名未顯者有鍾近衡少事澤南以克己自勵日記言動有過立起自責澤南語劉蓉曰吾門爲己之學鍾生其庶幾乎從平郡桂土匪叙從九品咸豐四年粵匪由江甯

上竄犯岳州借弟近濂各將五百人從王鑫破賊於靖港追至蒲圻羊樓司戰失利死之王鑫退保岳州賊又大至近濂亦戰歿易良幹謝邦翰並戰死南昌城下邦翰死後李續賓代領其衆所稱湘右營者是也諸人皆湘鄉人後並附祀澤南專祠

論曰湖南募勇出境勦賊自江忠源始曾國藩立湘軍則羅澤南實左右之樸誠勇敢之風皆二人所提倡也忠源受知於文宗已大用而遽殞澤南定力爭上游之策功未竟而身殲天下惜之忠源言兵事一疏澤南籌援鄂一書爲大局成敗所關並列之以存龜鑑此大將風規不第爲楚材之弁冕已